


NGÀZAMÀ, LOKUSÈTÀ,

YELÈKÈ, HAZILÀ

 Twasàkidila, Mwanèètù Neville. Mvwa mumòne nè bàvwa munkaci mwà kutentemuna cikòlokolo cikesè, anyi, anyi bàbàndisha díyì. Nudi mwà kungumvwa bìmpè anyi? Mbìmpè. Kùdi . . . Twasàkidilaayi.

Lutàtu lukesè, ànu katanci kakesè, mpàvwà, mwanèètù kampàndà mwimànyike kàshinyi kèndè mwaba mubi pambèlu apa, nè bantu, ngèèla meeji, mbaswè bwà yèyè kuàtentemuna. Ke civwà bwalu. Nè yèyè . . .

[Mwanèètù Gene Goad ùdi wàkula nè Mwanèètù Branham bwà bikòlokolo—Muf.] Eci cidi *kaaba aka* nunku anyi? Ambà túng bu mémè muumùshe eci nunku ewu? Nudi mwà kungumvwa bìmpè anyi? Ndi . . . Aci's mmùyàkwambabo mu Kentucky nè: “Tuvwa twelela mbila ku kaacipuka kàà cyanààna.” Mvwa ntàngila mu cikòlokolo *eci*, nè *eci* ki civwà nè cyà kwikala cyòci. Abi's mbìmpè. Twasàkidila, Mwanèètù Gene. Mpindyewu, leelù ewu, bìdi . . .

² Tudi nè disànka dyà kufila mulubù wa disangisha dyà mu—mu Middletown, mu Ohio, lumingu lushààle, anyi lumingu lwà kumpàlà kwà lushààle, mmwòmò's, mpindyewu. Aci's civwa ncikondo cyà butùmbi bwètù twètù. Tuvwa nè . . . Kaa, masangisha kaàvwa manène bikolè to. Kàdi pàvwà kule ne cimenga mu mwaba kampàndà wùdìbo bàbìikila nè Chatauqua, lwà pambèlu apu, kilòmèètà dikùmi nè yìsàtù anyi dikùmi nè yinaayi pambèlù pàà cimenga. Kàdi mwa—mwaba wà kusòmba wùvwa mupàte tètè, nè ùvwa mwambùle bantu binunu bikesè. Ncyèna mutàmbe kumanya bwà kucinka búngì bwà misùmbà yà bantu to. Nèku cintu cyà mushinga, civwa nè, Yesù wàkatwilangana neetù, nèku ke cidi luseke lwìmpè ncyòci aci. Nè cyàkatwàla bipeta binène, kùdiYe tudi tupèèsha butùmbi, Mukalenge Nzambi, bwà ditwènzela cyòci eci.

³ Nèku kùvwa bàmwè bàà ku bantu bàà batàmbe bwìmpè bànkadiku mutwilàngàne naabò kacya bàndela, mu ditùnga adi. Nè bu mùdìbi nè tudi pabwìpì menemene nè mikàlù mwab'ewu, ndi mufwànyine kwamba nunku nè, bàvwa byà pa lukàmà makùmi citèemà ne citèemà beena Kentucky. Cintu cyònsò muntwamu civwa Kentucky. Mwanèètù Sullivan kwabayè nè: “Mwanèètù Branham,” yèyè nè: “udi mumanyè nè, bònsò, pàmwè nè bònsò mu cibandabanda cikesè cidi cipìcila munwemu eci, mbeena Kentucky anyi?”

Ke mémè nè: “Ncivwa—ncivwa mumanyè aci to.”

Yèyè nè: “Èyowà’s, s’ki cìdìbo.”

4 Kàdi dilòòlò kampàndà mu disangisha kwenzekabì ànu nè nteelà nè: “Mbanganyi kaaba aka bàdi bafùmine ku Kentucky, elàayi byanza byènu muulu.” Mèmè kuzenzakana, mèmè kudyàmbidila nè: “Kùdikù muntu wa ku mwaba mukwàbò anyi?” Ànu buludi, beena Kentucky.

5 Nè bipeta bìvwa byà nkèmenu, majaaniki àbùngì be! Kùvwa mu—muntu mukàlàngà kampàndà, makèèlèlà awu, uvwa ùpicilamù, kupicilayè mwaba awu nè kungambilayè bwà bintu kampàndà bìvwa byenzèke, nè mikàndà mimfùndila yibwela, nè majaaniki mashiièshiièlàngàne. Nè pashiièshè kùvwa. . .

6 Kùdi muntu mùkàlàngà lwà paanyimà apa munkaci mwà kukwàta mikàbà ànu mpindyewu ewu, nè kwambayè, dilòòlò kampàndà, ngèèla meeji nè yèyè mmwàmbè “dilòòlò dyà ndekeelu,” pàmvwà nyiisha pa kaamukanku kakesè aku. Ke yèyè kwamba nè. . .Mu mulongo wà dijingulula, anyi bìvwa bifwànyìne kwikala mu batèèleji, ncyèna mwà kujaadika nè ncyèpì to, kàdi kùvwa muntu kampàndà uvwa ufùmina mu batèèleji. Ke Nyumà Mwìmpè kubanga kuyiikila nendè, nè kumwambila nè yèyè kàvwa wa mu ditùnga adi to, kàdi yèyè ùvwa wa mu Indiana, mwaba kampàndà mu Indiana mwàmwa. Ke yèyè nè: “Kwèna mwimàne kaaba aka bwèbè wèwè mwinè to. Udi mwimàne kaaba aka bwà mwànà mukèsè wa mu dibòko, ànu ngondo mikesè cyanààna, pàmwàpa ngondo yisàtù,” nè cintu bu nàнку awu. Nènku ùvwa nè cyà kupandiibwa, nè bìvwa bikèngela bwà kumupàtulabò mwoyi. Nènku cìvwa ngiikàdilù wa—wa wènta luse; bisùlusulu byàkù bikèsè abi byùlè, cyàdi cyàkù; kaacifù kàakù kakesè aku kàvwa kafwatàlale. Nè kumwambile bwà kuya pambèlu, bwà kèèdi mpatà to; nè bu yèyè kàyì mwà kwela mpatà to, ùvwa mwà kusangana mwanèndè awu bimpè.

7 Mpindyewu, ntèmù ùdi ànu mu cibambalu cìdì cìlonà mpindyewu eci, nè pàmwàpa mwànà wa mu dibòko awu ùdi mu batèèleji amu, bwà ku dyànyì pàànyì dimanya. Bisùlusulu byà mwànà wa mu dibòko awu kupinganabi mwàbì nè kale, nè kaacifù kakesè aku kupinganakù mwàkù nè kale. Nènku muntu udi ukwàta mikàbà yà mèyì kaaba aka awu, wà ùmwè wà ku mikàbà yà mèyì mu dindà emu awu, kulwayè nè maamù, taatù, nè wèndè. . .mwena mutumba wa udi ukwàta mikàbà yà mèyì ewu, nè kulwayè naabò, nè mwànà wa mu dibòko awu, nè kusòmbeshabò mwànà awu mu cibambalu amu, nè kwelayè mukàbà wà mèyì awu, cìvwa EMU MMÙDÌ MUKALENGÈ WÀMBA. Ke kwambayè nè pàakafikabo mu cikondo cìvwa muntu mùkàlàngà awu nè cyà kulwa kwimana yèyè mwinè ku cibùmà cyà ku cyambilu aku, nè: “Nyumà Mwìmpè kubwelayè mu cibambalu amu, bwalu kùvwa kusòmbè mwànà wa mu dibòko ànu mwaba awu, ùdila nè wènda ùnàya, nè ùtùngunuka.” Kabyàkakèngela dipandiibwa to. Bangàngàbukà

kabàvwa nè cyà kupanda to. Mukalenge wàkapanda mwànà awu, nè Bukolè Bwèndè bunène, bunène abu. Nènku mwànà mukesè awu musòmbe mwaba awu, munkaci mwà kunàya pa bulààlù bukesè, nè—nè maamù nè taatù basòmbe mwaba awu, nè mwena mutumba uvwa nmwà kwikala nè mpatà kakesè bwà cintu cyònsò aci; kàdi ki Bwikadi abu's. Aci cyòci kaciyi diitabuuja dyà bàpostòlò to, ncyèna mumanyè nè nciyi to.

⁸ Nudi bamanyè's, Bible mmwambè, pàvwà Yesù, ku mùpostòlò Peetèlò nè Yone, mwondòpe mulèmà awu ku ciibi, “Kabàvwa bafwànyine kwamba cintu nànsha cimwè cyà cibèngàngàne naaci to, bwalu muntu awu ùvwa mwimàne mwaba awu bu ntèmù.” Pa nàнку, Kilistò ùcidi ànu nè mwoyi. Butùmbi bwikalè kùdi Dìna Dyèndè. Busàmbi kaayipu mu matùkù aa's wè! Mpindyewu, aci's cidi ànu bùmwe bwà mu majaadiki àbùngi. Kàdi cidiku mu ditùkù edi, bwà kujandula nè Nzambi umweumwe awu, nè byenzi bimwèbimwè byà bikèmesha abi, bintu bimwèbimwè byàkenzàYe abi, Yèyè ùdi ùbyèna mùshindù ànu wùmweùmwe awu leelù ewu, bwalu Yèyè ùdi umweumwe awu makèlèlè, leelù, too nè kashidi. Tudi nè kusàkidila bwà kwikala nè dyèsè dyà kwikalakù badìsangìshe mu dindà emu mu Dìna Dyèndè.

⁹ Mpindyewu, túsambidilaayi patùdi twenda tuya ku mwaba nè ku mwaba apu, bwà kukwàcila Mukalenge mudimu mu dikùmbanyina dyàtùbùikidilàye adi. Nènku tudi nè disànkà dyà nè kakwèna ànu bàà ku tabernacle ewu to, kàdi bàà ku myaba yònsò, mu ditùnga dijimà emu.

¹⁰ Twasàkidila, mwanèètù wa bakàjì. Aci's cìvwa ncintu cyà lulamatu. Ndi mumanyè nè Nzambi munène wa mu Dyulu ùvwa mukumòne wenza cintu cimwècimwè aci. Inàbànzà kampàndà, mwànà mutekète menemene kutàmba mukwàbò, musòmbe kaaba aka. Nè mukàjì uvwa mu budimi bwà bwambi bwà Mukalenge, bidimu kumpàla kwà mèmè kulediibwa, yèyè nè bàyèndè; bidimu makùmi àtaanu nè byà mu njila, ùyiisha Èvànjeeliyò. Mwikàle ùkwàta mudimu mu biinà byà mabwe à makàla, bwà kumutwà nyama ku mikòlò mu budimi kampàndà, bwà kuyiisha Èvànjeeliyò ùndi ntwà nyama ku mikòlò ewu. Mukàjì mukùlumpè awu ùvwa musòmbe kumpàla eku, kàyi nè dikàpàkàpà to, ùkùpula bisùulùlù kwisù kwèndè; nè nsongàakàjì ùjuuka kuulu nè ùlwa nè ùmutwàdila dikàpàkàpà dyèndè. Pa nàнку, ndi nnwàmbila nè, ndi nè disànkà dyà kwikala mudìsangìshe mu dindà emu nè bantu bàà mùshindù awu abu, cìngenza disànkà dyà nè ndi mwena Kilistò, nè kudìsangìsha pàmwe nè beena Kilistò.

¹¹ Mpindyewu kùdi luuyà lukolè be mu ditùngà dyètù emu, nè mu ditùngà dijimà mpindyewu. Nènku tudi bindile dilwa dyà movù wà mabèjì àpòòpoka, pìikalà kuulu ne citeleela ndambu. Disangìsha dyètù dinène didi dilondà ditùdi bamanyè didi mu San Jose, mu Californie. Ke mwaba wutùvwà mu cipalu

cyà cialu cyà cinsangànsàngà bwà matùku makesè, nènku kùvwa dikùngwila dinène, ditùvwa katùyì mwà kufùdisha bwà kubàkùba to nànsha kakesè. Nènku misùmbà yimwèyimwè ayi yìdi munkaci mwà kutùdila masangisha àcilwalwà mfrangà mpindyewu ku cipalu cyà cialu cyà cinsangànsàngà ku San Jose. Nè tudi nè dyeyemena dyà nè panwìkalà nusòmbela kuntwaku, anyi balundà, bàfùndilaayi mukàndà nùbambilè bwà kwikalabò mu disambila. Byòbì kabiyì nàнку to, ikàlaayi munkaci mwà kutùsambidila.

¹² Mpindyewu, leelù ewu, mvwa mutèèje nè mvwa nè cyà kwikala mwab'ewu mu dindà emu, bwà kutwilangana mu masambila nè mu misèngeleelu kùdì Mukalenge, nè nwènu bònsò. Nènku kwòkù kwikàle beenyi munkaci mwètù, tudi tulòmba luse mùdì nzùbu wetù kàyì mwela byamù byà mashika, kàdi twètù tudi ànu èkèleeziyà mupèlè, mu bintu byà pa buloba, kàdi mubanji mu Diitabuujà mu Bukalenge bwà Nzambì. Nènku tudi tunùjingila difika dilenga bwà ditùkùmbula dikesè edi, tulòmba bwà nwènu kwalukila nè kwikala neetù cyàkàbìdì. Dingà ditùkù tudi tutèkemena bwà kwikala nè èkèleeziyà mutàmbe bwìmpè.

¹³ Katwèna nangànanà mu byà kwibaka kwà nzùbu yà èkèleeziyà mu matùkù aa to, bwalu tudi twitabuujà cyà bushùwà, nè mwoyi wètù wònsò nè, Mukalenge Yesù ùlwalwa kàtààtaakà. Kàdi pàdì bampàndànjlà bàsanganyibwa mu budimi bwà bwambi, munkaci mwà kuyiisha Evànjeeliyò, kabàyi nè bisàbaatà ku makàsà to, bàdya musangu ùmwè ku ditùkù, mmunyi mutùdiku mwà kwibaka èkèleeziyà wa ùyiila ndola mùliyò mujimà kumpàlà kwà cyòci aci? Ncyèna—ncyèna ànu mwà kucimòna to, nè pashiishe kwamba nè: “Mukalenge ùlwalwa kàtààtaakà.” Tùbwelàayi mu budimi bwà bwambi bwà kwenza citùdì mwà kwenza mu lukòngò elu. Kòkù kwikàle lukwàbò, nàнку. . . Bòbò nebàndamunè bwà lwàbò; twètù netwikalè bwà kwandamuna bwà elu. Kwènà ànu mwà kwibaka nzùbu yà yìyiila mìliyò yà ndola, nè bikwàbò, paanyimà pàà mumanè kwikala mu budimi bwà bwambi nè mucimòne.

¹⁴ Mpindyewu, mbilenga. Ngèèla meeji nè bìvwa bìkèngela bwà nzùbu wa Mukalenge kwikalayè mulenga. Nènku bìvwa bìkèngela bwà kwikalakù ka—kaaba kakesè kansantu. Kumwenza mwakàne nè mulenga wa dikèma nè mwèndè mwònsò, kàdi kì ncintu kampàndà cyà cinèkèshe to, bwalu katwèna tuumvwa cyòci aci.

¹⁵ Mpindyewu kumpàlà kwà twètù kusambila nè kubala Mifùndu, ndi muswè kufila ci. . . kì nkuyiisha mu dindà emu to, kàdi kufila muyiiki pa mifùndù. Nè pa ciibidilu pàndì ndwa. . . Ntu ngèenza cyòci eci ànu mu èkèleeziyà wanyì sungasunga, nè tudi mu èkèleeziyà wetù. Katwèna dingumba to. Twètù katwèna tusungulujangana bilondèshile màngumba to, ki ngiikàdilù wetù, nè katwèna baswikàkàne nè èkèleeziyà nànsha umwe

mu milongo yà dingumba to, kàdi tudi badisangè nè beena kwitabuuja bônso bàà màngumba ónsò nè bantu bônso pa buloba bujimà. Kaèkèleeziyà kèètù kakesè aka, mu dindà emu, nkamanyike pa buloba bujimà. Mikàbà yà mèyì yinùdì. . . Mayiisha aa, ànu makòsòlòke mùdiwu emu, kàdi pèètù tutwàtwa nyama ku mikòlò, mu madimi à bwambi, (mmatùnga meenyi búngì kaayì?) matùnga meenyi dikùmi nè citèemà, ànu pa mikàbà nkààyaayi.

¹⁶ Matùnga dikùmi nè citèemà mashìllàngàne àdi àngata Mayiishi nè àakudimuna. Muntu kampàndà, ànu bu mùndì munkaci mwà kuyiisha emu, muntu kampàndà wimana mwaba wàwa munkaci mwà kuyiisha ànu pàmwè naanyi. Nènku bàdi bènda bàya mu tuzùbù twà nsonà nè mu myaba kuntu kwàka kùdì Nzambi kàyì nànsha mumanyikè to, nè bàyiisha bampàngaanù abu, nè kùdì beena kalaba bàà mu Àfrikè nè mu Àmèrikè wa ku Sud, nè pa buloba bujimà, nè nkàmà yà bantu kuvudija ku nkàmà yìdì munkaci mwà kulwa kùdì Mukalenge. Bààbúngì bàdi munkaci mwà kwondopiibwa. Nènku's ke bwà cinyi tudi tudyumvwa nè mbyà mushinga wàbúngì bwà kusàka Mukenji, kí mmu nzùbu minène nè bikwàbò nànsha.

¹⁷ Nènku pashìshe pàndì mwab'ewu apa, ndi ànu nè malongesha à kuleeja pa Mifundu cyaanàanà. Kàdi, pàndì mpàtuka nya mu budimi bwà bwambi, ncìtu nyiisha Malongesha kampàndà à èkèleeziyà to, bwalu, kwenza nàнку, bìdì bìcìvwija cikolè be. Bantu nebàmbè nè dyànyì “Dilongesha ki ndyà cyà bushùwà to,” anyì cintu kampàndà cyà mùshindù awu. Kàdi wèwè muyiishè dimwè. . . Mémè nyiisha dilongesha dyà ba-Méthodistes, ba-Baptistes kabààkutwà ku cyànyì to. Mémè nyiisha dyà ba-Baptistes, dìbà adi ba-Luthériens kabààkutwà ku cyànyì to. Mémè nyiisha dyà beena Mpenta, dìbà adi ba-Nazaréens kabààkutwà ku cyànyì to. Mémè nyiisha ba-Nazaréens, dìbà adi église de Dieu kààkutwà ku cyànyì to. Pa nàнку, nudi numòna's, bikèngela ùtwe cintu kampàndà nyama ku mikòlò, kàdi, mu kulonda kwà cipaapu cyà mudimu, twètù tudi ànu twakidila mwena kwitabuuja yònsò, nànsha twitabàayi webè anyì dingumba dyèbè diikàle cinyi. Paùdì ànu mulediibwe cyàkàbìdì ku Nyumà wa Nzambi, udi mwanèètù wa balùme nè mwanèètù wa bakàjì. Kàdi tutu misangu yònsò ànu tujinga kudilama mùshindù ewu.

¹⁸ Nè pashìshe, bu Mukalenge mwà kwanyisha, leelù ewu, ndi muswè kuyiisha, mu èkèleeziyà wetù, èkèleeziyà wetù mmwimanyine pa Dilongesha dyà Bible, cìdì èkèleeziyà ùtwa nyama ku mikòlò aci, nè bwà cinyi tudi twenza cyòci eci. Nè mu kwenza kwà nàнку, tudi nè cyà kufùka anyì. . . katwèna nè meeji à kwenza nàнку to, kàdi tudi bafwànyine kajuula nkonko mu meeji à muntu kampàndà, wamba nè: “Èè, kacya ncìtukù mulongèshìibwe mu cyà nàнку to, anyì ku Cìitabuuja mu mùshindù kampàndà to.” (Twasàkidila.)

19 Nènkù byòbì byenzèke nè nwênù... èkèleeziyà wenù kàyì wítabuujà to, anyì kwèna wítabuujà ànu bintu bitùdì twakula bu Dilongesha dyètù dyà èkèleeziyà to, tudì batwìshìibwe nè kabyàkutwàla lutàtu nànsha lukesè to. Bwalu, cidya mene cyà kumpàlà cyà ditanta mu bwena Kilistò, nè bwà kuleeja nè muntu mmupetè Nyumà Mwimpè, ndidìpwekesha, didìpwekesha dilelèlè difidiibwe kùdì Nzambì, Didi nè cyà kufidiibwa nè didìpwekesha dyònsò. Kàdi, nànsha nànkù, èkèleeziyà udi kàyì nè Dilongesha ùdì ànu mùdì cintu citulùmùke amu; kèna nè mufùbà wà mwongo to. Pa nànkù, tudì nè cyà kwikala nè mufùbà wà mwongo munda mwàcì. Nè kaciyì kàbìdì ànu mufùbà wà mwongo to, kàdi nè mènù, kàbìdì, bwalu Èkèleeziyà wa Nzambì ùdì nè cyà kudyà Dyàmpà dyà Mwoyi.

20 Nènkù twètù, mu àmwè àà ku mēyì àndì mufwànyine kwamba, mēmè muteetè bwà kuCibweja bikolè, mpindyewu swàyi bwà kanùCyùmvùku bibì to. Aci, ncyèna nè meeji à kwikala nè ngaakwilù mukàyàbàle, mu kulongesha kwà Bible to. Kàdi mēmè, munda mwà bidimu makùmi àsàtù byà bukèbikebi, nciyì ngàngata twitabàayi anyì cintu nànsha cimwè to ànu Dìyì... Kùdì bantu mwab'ewu bàdì ba-Presbytériens, beena Kàtòlikè, ba-Baptistes, beena Mpenta, ba-Nazaréens, beena église de Dieu, Ba-Pèlerin de la Sainteté, mbasòmbe bònsò kaaba aka. Nènkù ndi mumanyè nè èkèleeziyà nè èkèleeziyà yònsò ùdì nè twitabàayi wendè sungasunga, nè ncyèna muswè kwimanyika aci to, kàdi ndi nteeta ànu bwà kupàtula Mifùndu patòoke bwà kucyènza nè Mifùndu. Pa nànkù dībà adi bònsò—bònsò nebùmwè nè kí mbwà kwikala nè ngaakwilù mukàyàbàle nànsha. Bidi ànu bwà kwikala nè dinanga nè dinanga, nè luse, nè mwànyì pàànyì mwònsò mùndìku mumanyè mwà kuumvwija Mifùndu amu.

21 Nènkù mpindyewu cyena-bwalu mu dindà emu neciikalè bu cyena-bwalu cile, nè ncyèna njinga kulwijakaja to. Ndi muswè kwangata dībà dyàbùngì ànu bwà bingìikalà mwà kwamba, nè kuteeta kubyùmvwija, bwà cinyì tudì tucyàmba.

22 Misangu yàbùngì mu masangisha, muntu kampàndà neámbe nè: “Èè, cidieye wítabuujà nciyì? Yèyè ùcidi ànu Baptiste, anyì? Yèyè mmwena Mpenta anyì? Ùdì wítabuujà dyakula dyà mu myakulu anyì? Anyì, ùdì *cikampàndà*, anyì *cikansanga* anyì? Yèyè mmwena dikùbiibwa dyà Cyendèlèlè anyì? Anyì, ùdì cinyì?” Nè dībà adi udi utèèla ànu cintu kampàndà cyùdì aci, nebàkuluke bu bilùngà byà mudilu. Nàsnha bìshi, kabàkutùuja bwà kutèeleja, bwà kukenketa to, kàdi nebàkulekèlèlè nè lùkàsà lwònsò.

23 Mwaba nànsha wùmwè mu masangisha àànyì, mu dībà nànsha òmwè, ncitukù mwanji kumanya byà dishiya dyà dibenga kupetangana munkaci mwà bānà bèètù abi to. Ntu misangu yònsò ànu nyiisha Dilwa dyà Mukalenge, lupàndu,

nè—nè dyondopa dyà kùdi Nzambi. Aci kacyèna citàpa muntu nànsha umwe ku mwoyi wa Èvànjeeliyò mu Kaabujimà to.

²⁴ Pashiishe mu èkèleeziyà emu, ndi nè Dilongesha dyètù sungasunga. Didi dipàtuka munkaci mwà bantu bàdi bàlwa, nè bamba nè: “Èè, mémè. . . Mwanèètù Branham’s mmwambè *cikampàndà*, bintu abi.” Èè, bikèngela twikalè nè Dilongesha.

²⁵ Mpindyewu, ànu àbìdi mashààle aa mu disangisha, pàvwà muntu kampàndà mukonkè musùmbà wà bambi. Bafùndi bàányi nè bakwàbò bàdipù. Mikàndà mimfùndila yàbùngì, yàbùngì mmilwè, nè yàmbà nè: “Mwnèètù Branham ùdi witàbuuja di—dikùbiibwa anyi dilama, dikùbiibwa dyà mwena kwitabuuja anyi?” Èè, mvwa mumanyè, mu kasùmbù kàà beena nè ànu mikenji ke bàvwà bèèla lukonko alu, mbifwànyine kwikala bikolè bwà mémè kucyàmba; mbafwànyine “kuumushakù byanza” nè lùkàsà lwònsò. Nènku aci kacyèna nè cìdici cishintulula to nànsha kakesè nànsha wéwè witàbuuja aci anyi to; pàdìbi ànu nè udi musùngìdìibwe, ke cintu cyà mushinga ncyôci aci. Nènku ncivwa mwambè cintu nànsha cimwè to. Kàdi èkèleeziyà mishìilàngàne dikùmi nè yisambòmbò yàkabènga kutùùla mfrangà, nudi numòna kùdi. . . bwalu ndi mubènge bwà kwandamuna, bwà dilama dyà bwobùmwe nè bantu.

²⁶ Mpindyewu, mu èkèleeziyà mu dindà emu, ndi muswè kuumvwija bwà cinyi ndi ngiitabuuja cindi ngiitabuuja.

Tùsambilàayi.

²⁷ Mukalenge, Wákabiisha cyàkàbìdi Yesù ku bafwè awu, nè kutùpèèshaYè bu Mulàmbù wà dinanga Dyèbè kutùdi, nè ku dyoweshangana dyà màyi ku Díyi, Yéyè mmujidile cisàmbà cyà pabwàci, kasùmbù kabìkila bwà kupàtuka, nènku tudi bindile nè lutùùlù lwònsò Dilwa Dyèndè Diibìdi. Nè tudi bamanyè nè, ku mèsù kwà bantu, kùdi twitàbàayi nè màngumba bùngì cyanààna. Nènku, Taatù Nzambi, tudi baswè kulòmba bwà Ùbeneshèku yònsò wa kùdìbo. Nè ngiimànyinù udibò baciimànyine, nànsha mutùdi mwà kubèngangana naabò pa bintu byàbùngì, nànsha nànkù, mu mèyi makùlù, bu beena Kilstò nè bânà bàà muntu, tudi beelàngàne naabò kàpà. Nènku kí ng’ànù beelàngàne ànu naabò kàpà pàtupù to, kàdi batèèkèle mwoyi pàmwe. Mu ditùkù dyà dibenga kucyùka dyà maalu edi, pàdi bantu nè mutù mukolè nè badibàndishi, banangi bàà bisànkasanka byà pa buloba kutàmba Nzambi, tudi tulòmba, Èyi Nzambi, bwà Nyumà Mwímpè àswikèku myoyi yètù pàmwe menemene, bònsò, ku ditùkù nè ku ditùkù. Ondòpàku babèèdi mu dindà emu, Mukalenge.

²⁸ Kùdi aba bàdi nè cyà kubwela mu dibàtiiza dyà mu màyi. Nènku tudi tulòmba bwà Nyumà Mwímpè Webè àbùjèku nè (kùdi) Bwikadi Bwèndè bóbò kabàyi banji kubùpeta. Swàkù bwà bàtwibwè citampi kule nè bintu byà pa buloba, nè bùlè tètè nè

Nyumà wa Nzambi, mu dinanga dyà Nzambi, nè mu bwobùmwe nè bantu bônso.

²⁹ Mukalenge, munkaci mwà matùngà à buloba bujimà, bu mŪdi muntùme, mèmè muntu udi kàyì mumanyè mukàndà, kàdi nànsha nànkù, Mukalenge, mwikàle ngùitabuujà munda mwà mwoyi wànyì, Kùdì, bintu bìndì mwtàbùùje nè mulongèshìibwe kùdì Bible, nè bishìndika kùdì Mwanjèlò wa Mukalenge Udi mwimàne kaaba aka bwà kushìndika cìdì cyambiibwe, piikalàci cyà kùdì Nzambi. Misangu yàbùngì, bantu bàtu bèèla meeji nè mèmè ndi mudì wa cibàngà. Wèwè ngudi mulumbulwishi wa mwoyi wànyì. Kàdi bu Pòlò wa kale awu, wàkayiisha mene nè cyena Yudà too nè pàakapetàye dyeyemena kùdì bantu, nè pashìishe kuyiishayè Kilistò mupoopela pa nkùrusè; kàdi dyàmbedi bwà kupeta dyeyemena kùdì bantu, bwà Mukenji wèndè wàmòna mwà kwikala mutwè mukèlè. Tudi tulòmba, Èyì Mukalenge, bwà Wèwè kutwìshakù mukèlè muyiiki wètù nè bwobùmwe bwètù, nè Mukèlè wà Nyumà, nè Mashi à Mukalenge Yesù, nè àtùvwijèku bantu bàdi babiikidiibwe, nè bwà bàà pa buloba bààmòna mwà kutàngila nè kutàbaleela myoyi yètù, nè pashìishe kulwa nè nyòòtà bwà kwikala bu twètù. Tùlamèku badìpwekèshe, nè buujiibwe tètè nè dinanga Dyèbè nè Nyumà Webè. Bwalu tudi tulòmba nùnkù mu Dìna dyà Èwu Wàkasambila bwà twètù kwikala umwe awu, dìbà adì, bwà bantu bônso bààfwànyina kumanya nè twètù tuvwa bàna Bèndè, patùdì nè dinanga muntu bwà mukwèndè. Amen.

³⁰ Mpindyewu, bwènù nwènù, ndi mumanyè nè kùdì luuya ndambu. Nè kòkù kwikàle—kwikàle dikàpakàpa dyà panshì lwà paanyimà apa dìdìbo baswè kutwàla mwaba kanà wónso, wùdì mufwànyine kumwèka mutàmbe bwìmpè, mbìmpè. Ndi njinga kubalakù ndambù mpindyewu mu Mifùndù Minsantu.

[Mwanèètù Neville ùdi wàmba nè: “Cipeepudi eci cìdì cìkutàcìsha anyi?”—Muf.] To, mukalenge. Kì mpàdìci panshì mùshìndù awu to. Ngèèla meeji nè mbifwànyìne kwikala bìmpè, Mwanèètù Neville.

³¹ Ndi muswè nùbuululèku pàmwè naanyì mu Mifùndu, ku Mukàndà wà Yowèlà, nè pashìishe ndi nè myaba yàbùngì mwab'ewu yìndì muswè kwanji kubala, dyàmbedi, bwà kupeta muyiiki kampàndà, dyumvwija kampàndà bwà muyiiki. Dyàmbedi, mu Yowèlà, nshapità 1, kubangila ku mvensà 1, nènku kubala mvensà mwi4. Nè pashìishe mu nshapità mwi2, wa 25 too nè ku wa 27, netùbalè bwà dibala dyà Mufùndu.

Nènku *dìyì dyà MUKALENGE . . . dyàkalwa* kùdì *Yowèlè mwànà wa Petùèlè*.

Tèèlejààyi eci, nwènù bantu bakùlumpè, nè tàyayyi dìci, bantu bônso bàdi basòmbèle pa buloba ebu. Eci cìvwaku cyenzèke mu matùkù ènù, anyi mene mu matùkù à baatatwènù anyi?

Nücyambilaayi bânà bèènú balela, nè bânà bèènú balela bàmбилè bânà bààbò balela, nè bânà bààbò balela lukòngò lukwàbò.

Bwà nè cìvwà mukùmbì wà ngàzamà...mushiye mukùmbì wà lokùsètà mukùmbì wà lokùsètà wàkacìdya; nè cìvwà mukùmbì wà lokùsètà mushiye mukùmbì wà yelèkè wàkacìdya; nè cyàkashiyàbo kùdì mukùmbì wà yelèkè mukùmbì wà hazilà wàkacìdya.

³² Nè pashìishe mu mvensà wa 25 too nè ku wa 27, wa nshapità mwi2.

..Nènnwalùjùlwìlè bidimu bìvwà mukùmbì wà lokùsètà mudyè, mukùmbì wà yelèkè, nè mukùmbì wà hazilà. . . mukùmbì wà ngàzamà nè mukùmbì wà hazilà, cilwìlu cinène cìmvwà mutùme munkacì mwènù.

Nèнку nenùdye nenùùkutè, nè nenùsànkishiiwbè, nè nenùtùmbishe dinà dyà MUKALENGE Nzambi wenù, wìkala munwenzèle maalu à kukèma: nèнку cisàmbà cyànyì kacyàdyàkufwìshiiwbwa bundù nànsha.

Nèнку nenùmanyè nè mèmè ndi munkacì mwà Izalèèlà, nè mèmè ndi MUKALENGE Nzambi wenù, nè kakwèna mukwàbò nànsha umwe to: nè cisàmbà cyànyì kacyàdyàkufwìshiiwbakù bundù nànsha.

³³ Pashìishe mu Mukàndà wà Loomò, nè mu nshapità wa 1 wa Loomò, nè mvensà wa 25, ndi mbàla eci nùнку. Netwàngatè wa 24, kàbìdì.

Ki bwà cinyì Nzambi wàkabàfìla ku dikooyika kupicìla ku nkùkà yà myoyi yàbò sungasunga, bwà kufwìsha mibidì yàbò mene bundù munkacì mwàbò bóbò biinè:

Bààkashintulula bulelèlà bwà Nzambi kubùvwija mashimi, . . .

³⁴ Nè pashìishe mu Loomò, nshapità mwi3 ku mvensà mwi4. Loomo mwi3, ku mvensà mwi4, tudì tubala. Katùpà kàà kumpàlà kàà mvensà mwi4 awu.

Nzambi kùtabìku to: . . . Nzambi ìkalè mulelèlà, kàdì muntu yònsò mwena mashimi; . . .

³⁵ Mpìndyewu tudì tubwela mu meeji à mushinga mukolè pa cyena-bwala eci. Nèнку mpìndyewu tudì. . . Ndi ngùitabuujà nè nekùlwe cikondo cyà dyalujulula dyà bintu byònsò bìdì byenjiiwbwe bibì abi. Nèнку tudì tuteeta, nè byònsò bìdì munda mwètù, nè bantu bakwàbò bàdì munkacì mwà kuteeta, batangadìki banène bu mùdì Billy Graham nè Oral Roberts, nè bakwàbò bààbùngì bàà ku batangadìki bàà batàmbe kumanyika abu, bambi, bampaasàtà, bàdì nè lulamatu ku mwaba wàbò wà mudìmu, bàdì bàteeta kumòna ditàbuluja mu cikondo cyètù. Nè nwènù, bânà bàà Nzambi, nudi munkacì mwà

kusambila bwà ditàbuluja mu cikondo cyètù. Binunu makùmi byà masambila bìdi bitwilangana nè Nzambi dîbà dyònsò, bwà ditàbuluja mu cikondo cyètù. Nè mbafùnde mu Mifùndu nè: “Bantu bàdi babiiikidiibwe ku Dîna Dyànyì bôbò badikungwije pàmwè, nè bôbò basambilè, dîbà adi Mémè nèntèelejilé mu Dyulu.” Mpindyewu, pùikalà bânà bàà Nzambi munkaci mwà kudisangisha nè bàsambila bwà ditàbuluja mu dîbà dyètù edi, nè ditàbuluja kadiyikù dilwa to, dîbà adi kùdi nè cyà kwikala cintu cipampàlamùke mwaba kampàndà.

³⁶ Mpindyewu, vùlukàayi, nè, cintu kanà cyònsò eci cidi mwà kukwàta mudimu ànu paùdi ukwàta mudimu bilondèshile mukenji wà cintu aci. Makolè à mu cibwàshìbwàshì àdi mwà kunyunga ànu bilondèshile mukenji wà mu cibwàshìbwàshì. Mabùlungù àdi mwà kutentemuka ànu pàdiwu matentèmùnyiiibwe kùdi mukenji wà mabùlungù awa. Dîbà didi mwà kupàtuka ànu bilondèshile mùdi buloba bùyungulukila ku dîbà. Nè dyòdi adi, didi, cintu cyònsò cidi nè cyà kwenzeka bilondèshile mukenji wà ndongamu wadi. Bwalu, Nzambi wàkenza bintu byònsò, nè wàkenza mukenji bwà cintu aci. Nè pashiiishe cidi nè cyà kunyunguluka, nè kukwàta mudimu, kwenza bilondèshile mukenji wà cyôci cintu aci. Kacyàkukwàta mudimu mu mùshindù mukwàbò mujaalàme to.

³⁷ Kwela munyòlòlò ku kàlayi, nè pashiiishe kumwela ku scie. Udi mufwànyine kwikala mukùmbàne bwà kwenza ndambù wa dîbà. Kàdi mùshindù wùmwèpelè wuwikalàku mwà kwenza dîbà dikùmbàne nè mùyòlòlò awu, ngwà kwela kàlayi kàdi kakùmbànàngàne nè kàlayi kàdi paanyimà pààkù, nènkù pashiiishe masòsò makesè àdi mu mùyòlòlò awu àdi àpetangana, ànu menemene nè kàlayi, dîbà adi udi mwà kuya mwaba kampàndà.

³⁸ Nènkù ndi mutwishiiibwe nè tudi nè kàlayi kabì mwaba kampàndà. Èkèleeziyà ùdi wènda ùtàmba kuya nè lujòòkò bwà dîbà ditùdi nè mwoyi edi. Kùdi cintu kampàndà cipampàlamùke ànu menemene. Nènkù mbujitu butwimikila mu ditùkù edi, ku Dilwa dyà Mukalenge didi pabwipi edi, bwà kusòmba panshì nè kulonga nè kumòna cidi kaciyi cyènda bilenga, kumanya cidi cicilelà. Kwèna mwà kupeta bwanga paùdi kùyì mupetè ciledi cyà disaamà to.

³⁹ Bu ngàngàbukà, bu wèwè mwà kubwela mu bìrò byèndè kàdi kwamba nè: “Mutù wùdi wùnsaamà, nè cifù cidi cinsaama,” nè yèyè kukupèèsha ka-aspirine kakesè, anyi cintu kampàndà, nè kukupingaja, ùdi ùteeta ànu bwà wèwè kumushiiila kaaba. Ngàngàbukà, mulelèlà mukùna ku dikàsà nènzè mateeta à cintu aci too nè mwàpetàye cidimba cidi kaciyi cyènda bimpè, pashiiishe kukwàcila mudimu ku cidimba aci.

⁴⁰ Ke mùshindù wùdibi bwà Bukalenge bwà Nzambi. Bidi bikèngela bwà twètù kujandula cidi kaciyi cyènda bimpè to, dîbà

adi kukwàcila mudimu ku cyôci aci. Mifundu yidi bu mùdi kabèji kàà bwanga kàà ngàngàbukà amu.

⁴¹ Ngàngàbukà kampàndà, beena maalu à mamanya, udi wenza mudimu mukolè bwà kupeta kabèji kàà bwanga bwà . . . bwà di—dishipa dyà kîshî kampàndà, dîsaamà dîdi mu mubidi wèbè, bu mùdi mubidi kapyà wà cîfòyidè, anyi—anyi dîsaamà kampàndà, dîdîbo mwà kukupèeshila mâyi ikalà mwà kushipa kîshî kàà cîfòyidè aku, nè kàbîdi kàdi nè cyà kujomonyiibwa nè mbàbi yônsò (. . . ? . . .), kujoomonyiibwa nè mbàbi yônsò, mu mùshindù ewu nè: kwôkò kakûyi búngi bukùmbàne bwà cyôci aci to, kacýàkwambulwisha mubèèdi awu to; nènkú kwôkò kwikàle cintu kampàndà cikwàbò cisàkidila, ncîfwànyine kushebeya mubèèdi awu. Bikèngela cîfidiibwè kùdi musùmbishi wa manga à lwondapu, ànu bilondèshile kabèji kàà bwanga aku.

⁴² Ki bwà cinyi, kwôkò cintu kampàndà cibi mu èkèleeziyà leelù ewu, cidi cyèenza nè kèna útanta mu mùshindù wùvwàbi bikèngela to, cidi bwà ku dyànyi pàanyi dimòna nè bivwa bikèngela bwà twètù kwalukila ku Kabèji kàà bwanga, kujandula ànu menemene cidi cibi, nè èkèleeziyà ewu ùdi ùsaama bikolè nè kùdi dîsaamà mu èkèleeziyà wetù, dîsaamà dyà mpèkaatù. Dîbà adi tudi nè cyà kujandula cîvwà Ngàngàbukà mufundè, nè kumòna bampaasàtâ bèètù basùmbishi bàà manga à lwondapu aba ní bàdi bàtùpèèsha Kabèji kàà bwanga kajaalàme. Nènkú, vùlukà nè, udi mwà kusàkidila cintu kampàndà ku Mufundu wà pabwipi menemene ùdibo bapetè, nè kushebeya mubèèdi awu. Nè pàmwàpa, ncyèna ngàmbe nè ke citùdi benzè to, kàdi ambàayi túng bu nè bàmwè bàà ku benji bàà manga bètù bàà manga à lwondapu aba mbasàkidile cintu kampàndà ku Kabèji kàà bwanga kàà Nzambi? Pùikalàbo basàkidile, bàdi bàshipa mubèdi, bàbàlekela bàfwila mu mpèkaatù.

⁴³ “Èè, cidi,” mùdi wamba, “èè, pùikalàbi nè bàvwà nè meeji matòoke!” To, aci kî nkabingila to.

⁴⁴ Muntu, mwenji wa manga, wàkapèèsha muntu àcide carbolique, munwemu bidimu bishààle ebi, mwikàle ànu nè meeji matòoke nè mwèndè mwònsò, nè káfwancoolò kamanyike kùdi mbùlâmàtadi, kàdi bwàkashipa muntu. Nànsha nànkú, yèyè ùvwa nè meeji matòoke. Kakwèna . . . Meeji matòoke, nkààdikù mumòne meeji matòoke munkaci mwà bampàngaanù, àdi mafwànyine kufikisha meeji matòoke à bwena Kilistò ku dimwèka bu cintu kampàndà cyà cikùlukulù. Nkààdikù mumòna bampàngaanù bàvwà mwà kutèeka bàna bàabò bàà mu mabòkò mukana mwà ngandù, bwà kumulàmbula kanzambi kàà mâyi. Ncivwa mwà kupeta meeji matòoke à mùshindù awu munkaci mwà beena Kilistò to. Nkààdikù mumòne bantu bàvwà mwà kwikala balààle pa misongolo. Nè kucibula mifùbà yà makàsà àbò pàcidibo bàna bakesè; mvwa mubàmòne bàngata bàna bàà mu mabòkò nè bàna bakesè abu, nè bàbàtapa nè

bàbàsàla, nè bàbàpàtula mashi, nè míngà misangu bàbàshipa. Nè meeji matòòke à mu ndòndò, kàdi's mbapiile.

⁴⁵ Mpindyewu twánjàayi kujandula cintu kampàndà. Yobò, anyi Yowèlà's, èyowà, ndi mupè-...ngèèla meeji nè yèyè mmutùpèèshe cishìmikidi cinène kaaba aka. Nènku's ke citùdì baswè kwangata bwà kubala ncyôci aci. Yèyè wàkamba nè:

Nwènù ambilaayi—ambilaayi *bànà beenù...bànà bènú bàmBILE bààbò bânà, nè bààbò bânà, nè bààbò bàmBILE bakwàbò abu, nè bikwàbò, too nè ku lukòngò lukwàbò, ke ciikalà bàà Bisàmbà byà bendè. Ambilaayi Izàlèèlèà bwà àtungunukè nè kucyàmba.*

⁴⁶ Nènku mpindyewu Mufùndù wùvwà Yowèlà mwambè ewu wùlù leelù ewu patùdì twètù, bàà Bisàmbà byà bendè, baWàkìdìlè. Yèyè wàkamba nè:

Nè cyàkashiyàbo kùdì mukùmbì wà ngàzamà mukùmbì wà hazilà wàkacidya;...mukùmbì wà hazilà, mukùmbì wà lokùsètà, nè bikwàbò.

⁴⁷ Nènku bìshì ebi, bu nwènù mwà kwangata mukàndà wènù wà pa bìshì awu, nenùmòne nè bìshì binaayi bishiilàngàne abi bìdì ànu cìshì cimwècimwè aci mu bitùpà binaayi bishiilàngàne byà mwoyi wàci. Twètù bônso tudi bamanyè nè lu—nè lu—lukùtù kî ncíngà cintu to ànu mukùmbì wà hazilà mubwikila, nènku nelùtooyè cibèyibèyi; nè cibèyibèyi's mmukùmbì wà hazilà kumpàlà kwà kutooyikaci. Ngàzamà, lokùsètà, nè bikwàbò, ncintu cimwècimwè aci. Ncìshì cimwècimwè aci. Mpindyewu cyònsò cìdici. . .

⁴⁸ Mpindyewu, tèèlejàayi nè ntèmà. Cyònsò cyàkenzekà dyàmbedi, nè cìshì cyà ngàzamà, cyàkalwa ànu hazilà, pashiishe. Nènku hazilà kulwa lokùsètà, pashiishe. Nè cyònsò cìvwàku aci cyàkabangà ku cibangidilu aci, cìcidi ànu cintu cimwècimwè cìdì munkaci mwà kukèba lutàtù leelù ewu aci. Nènku twàlukilàayi mpindyewu mu Mifùndu bwà tùjandule cyàkatwàdijà.

⁴⁹ Mpindyewu, tudi bamanyè nè tudi mwà kwibaka èkèleeziyà, dyàmbedi, ànu nè byà mudimu bìdì Nzambì mutùpèèshe bwà kumwibaka naabi abi. Ke cyònsò citùdì naaci ncyôci aci. Nè ndi ngèèla meeji nè, kumpàlà kwà...Ndi mumanyè nè Eci ncikolè, nè Cidi pa mukàbà wà mèyi, nkàmà yà bantu pa buloba bujimà nebàteelejè. Kàdi kumpàlà kwà twètù kupeta nzùbu wa Èkèleeziyà wa Nzambì, netwikalè nè cyà kwalujulula bintu byònsò abi bìvwà bìshì ebi bidyèMu. Netwikalè nè cyà kwalukila bwà kujandula cìvwà bìshì abi bidyè. Nènku kumpàlà kwà Mwonji wà mvinyò wà Mukalenge ewu, Mwonji wà tumuma twà mvinyò. . .Yèyè's ke Mwonji wà mvinyò; twètù tudi matàmbà. Nènku kumpàlà kwà twètù mwà kujandula, anyi Èkèleeziyà mwà kwimana mu bukolè bwèndè bwà bumanyika nè bwà ku cibangidilu abu, nebikèngelè bwà twètù kwalukila paanyimà nè kujandula cìvwà bìshì bidyè. Nè nebikèngele

bwà Èkèleeziyà awu kwalujuludiibwayè ku cyôci aci, anyi kààkwimana mu bukolè bwèndè nè butumbi bwà ngiimànyinù wèndè wa dyàmbedi awu to.

⁵⁰ Cizubu cyôci cilamùnyiiibwe ku mucì, tudi nè cyà kwalujakù cizubu cyàkàbidì. Kutòlwesha cizubu, dyàmbedi. Kwènà mwà kupeta pommes paùdì kùyì mwânjì kutòlwesha cizubu to. Bwalu, cizubu ke njila udi màyi à mucì àlondela. Njila wa màyi à mucì njila wa mwoyi.

⁵¹ Nè Mifundu, Bible wa Cijila wa Nzambi, ke njila wa Mwoyi bwà èkèleeziyà kanà yònsò ewu. Mmunyì mutùdi mwà kutwàdila màyi à mwonjì wà mvinyò mu cizubu cyà mucì wà sukòmò? Kabyàkukùmbana ànu to. Tudi nè cyà kwikala nè cizubu cyà Mwonjì wà mvinyò. Tudi nè cyà kwikala nè cizubu cyà ku cibangidilu. Nènku kùdi mùshindù ànu wùmwèpelè wùdi bizubu abi mwà kwalukila pa Mwonjì wà mvinyò, mpàdì Nzambi ùcikolesha, Yèyè mwinè.

⁵² Twètù katwèna mwà kwenza cikwàbò nè kucitèèkapù to. Kabyàkukùmbanakù to. Màyelè nànsha àmwè menza ku byanza byà bantu kaàdyàkukùmbanakù nànsha. Nebikengela njila wa Nzambi bwà cyanàànà kacýàkwikala nè mwoyi to. Màyelè makwàtakaja kùdi bantu awu kaàkukùmbanakù to. Udi mwà kujingila mukùsù ku mucì, kàdi kwamba nè: “Ûlekèle wùkolè.” Mukùsù kawùvwa ndongamu wa Nzambi to. Bikèngela cikalè cizubu, njila wa mwoyi, nè pàdiwu wùfùmina mu miji, newùpatulè mwoyi wùmwèwùmwe wùvwa naawù mucì awu kumpàlà kwà twìshi kuwùdyatù.

⁵³ Kabyèna bikèmesha to mutùdi katùyì mwà kwenza tùmpanyè twà dyondopa. Kabyèna bikèmesha to mùdi èkèleeziyà mipandùlùke. Kabyèna bikèmesha to mwikalà umwe wàmba nè: “Kaa, *cikampàndà*, *cikasanga*, nè *cikankènga*,” bibèngangana mùshindù awu. Kabyèna bikèmesha to mùdi tusùmbusumbu bu nànu munkaci mwètù to, mbwalu katwèna mwà kukwàma mamuma mahlèlè à lutùùlù, mwoyi mule, bwimpè, bupòle, kalolo to. Nshinga wa Mwoyi mmukòshiiibwe ku Mucì, nè katwàkuwùbàndishila ka twitabàayi yà mukùsù kampàndà anyi nì nku cizubu kampàndà cipingaja nànsha. Nebikengelè bukolè bwà Nzambi wa Bukolè bwònsò bwà kutòlwesha mucì awu cyàkàbidì mu ngiikàdilù wawù.

⁵⁴ Yesù kààkambakù, nè Mifundu mmyambè nè: “Bàdi nè mèsù kàdi kabàyi mwà kumòna to, bàdi nè macì kàdi kabàyi mwà kuumvwa to anyi?” Kabèena ànu mwà kucyènza to. Nè muntu nànsha umwe kèna mwà kulwa kùdi Nzambi, anyi kùdi Kilistò to, pàdi Nzambi kàyi mumubuulwileci.

⁵⁵ Ditùkù adi mvwà ngàakula, nènku tuvwa twelangana meeji ku Mifundu. Mèmè kwamba nè: “Mbwa cinyi bantu kabèena mwà kumòna Cyôci aci’s?” Mèmè nè: “S’ki cyôci aci,” ke mwàkamvwilàbi bwà mèmè kudyàmbedila. Nànsha

Dyôdi ditòòke dyà bishi, nànsha Mifundu miDilongeshe bishi, kanwàkwikala bakumbàne bwà kuCimòna to pàdi Nzambi kàyì munùleejèCi to; nànsha Cyôci citòòke bishi. Nè Bible mujimà mmwibakila, nè Èkèleeziyà mujimà wa Nzambi udi nè mwoyi, mmwibakila pa dibuulula dyà nyumà dyà Diyì. Abèlè wàkalàmbula mulàmbù mwìmpè kutàmba wà Kaayinà bwà cinyi? Bwà cinyi Abèlè kàakalondakù Kaayinà; yèyè's ùvwa nè èkèleeziyà mutàmbe bulenga? Kàdi bàakamubuulwilaci.

⁵⁶ Pàakafùmà Yesù ku Mukùnà wà Dikùdimuka dyà mpàla, nè kwambabo. . .

“Bantu bàdi bàmba nè Mémè Mwànà wa muntu ndi nganyi?”

⁵⁷ “Umwe wàmba nè ‘Eliyà,’ nè umwe wàmba nè Wèwè udi ‘mupròfeta awu,’ nè bikwàbò.”

Yèyè nè: “Kàdi nwènù nudi nwamba nè Ndi nganyi?”

Peetèlò kwambayè nè: “Wèwè udi Kilistò, Mwànà wa Nzambi udi nè mwoyi.”

⁵⁸ Yèyè nè: “Udi mubèneshiibwe, Simonà, mwànà wa Yona, bwalu kî mmusunya nè mashi bìdi bikubuulwile eci to. Kacya kùtukù mucilongèle mu mikàndà kampàndà, anyi mu sèminère kampàndà, anyi mu cituùdilu kampàndà cyà màyelè makwàtakaja kùdi bantu to. Kàdi Taatù Wanyì mu Dyulu ngudi mukubuulwileci, nè pa lubwebwe elu Nèngiibakilèpu Èkèleeziyà Wanyì, nè biibi byà ifernò kabyènakù mwà kuMutàmbe bukòlè nànsha.” Ki bwalu mbwòbù abu’s, dibuulula dyà nyumà dyà Diyì dyà Nzambi.

⁵⁹ Mu Maatàayi 11, ngèla meeji nè mmwòmò, anyi 12, mwaba kampàndà muntwamu, bàakafùnda nè, mùdibo bambè nè: “Nànsha mùvwà Yesù mwenzè bishimà byábúngi amu, bimanyinu byábúngi byà nè Yèyè ùvwa Maasiyà abi, kàdi bantu kabàvwa ànu mwà kuciitabuujà to. Bwalu Yeshàayi wàkamba nè: ‘Bàdi nè mèsù kàdi kabàyi mwà kumòna to. Bàdi nè maci kàdi kabàyi mwà kuunvwa to.’” Mmunyi? Nànsha mene mùvwàbo balongi bàà mabàla amu, nànsha mùvwàbo mu katòngòbèla kàà maalu à ntèdeleelu amu; bàvwa bàà cijila, nè kabàyi kalèma nè kabàyi kadyuwù to. Bòbò babàsangàne nè katòba kàmwè kàà bubì, bàvwa bààshiibwa mabwe, kakùyì luse to. Muntu nànsha umwe kàvwa mwà kutwà munu pa bwalu abu to. Bàvwa bàlonga Mifundu, muunya nè bufuku, ku lukòngò nè ku lukòngo, kàdi Nzambi ùcivwa ànu mubàfòfòmije mèsù.

Wèwè udi wamba nè: “Nzambi wènza nànkù anyi?” Ke cyàkambàYe ncyôci aci.

⁶⁰ Nzambi ùdi wènza cidiYe muswè kwenza aci. Katwèna mwà kuMwambila cyà dyenza to. Pòlò, mu Mukàndà wà Loomò, nshapità wa 8, kàakamba nè: “Nzambi wàkajuula Pàlò nè wàkapapisha mwoyi wèndè, kumufòmija mèsù, bwà kiipàcilà kàmwèkàmwè aka, bwà diswa Dyèndè dyàmònakù

mwà kukùmbana” anyi? Esawù nè Yakòbò kabàvwa...? Esawù, wàkabèngiibwa, kumpàlà kwà mwànà wa balùme awu kulediibwayè; Nzambì wàkamudyombola. Nudi numòna’s, byònsò abi bìdi bìkwàta mudimu bilondèshile didyànjlakulongolola dinènè dyà Nzambì. Yèyè kî ng’Ewu udi mulààle tulù to. Yèyè mmumanyè ànu menemene.

⁶¹ Nè tudi tulumbulwisha bantu bilondèshile wabò... bimwèke ànu bu nè, dyeyemenyiibwa dyàbò anyi meeji àbò matòòke. Tudi tulumbulwisha maèkèleeziyà bilondèshile ditanta dyàwò. Tudi bakashààle bàà mu cikampàndà, tudi twangata batangadiki, bwalu mbanène. Kî ng’Aci to.

⁶² “Maulu nè buloba nebìjiminè, kàdi Dìyì Dyànyì kadyàkujiminakù to.”

⁶³ Cyàkashiyàbo kùdi ngàzamà, hazilà wàkacidya. Kùdi cintu kampàndà cibi, mwaba kampàndà, bwalu Dìyì dyà Nzambì ndyà Cyendèlèlèlè ànu mùdìYe wa Cyendèlèlèlè amu. Nè Dìyì dyà Nzambì kadyèna mwà kupangilakù to ànu mùdì Nzambì kàyì mwà kupangila, Yèyè mwinè amu. Mpindyewu, kùdi cintu cibi, mwaba kampàndà.

⁶⁴ Pa nàнку twàlukilàayaaku mpindyewu. Cishimikidi mpindyewu citùdi batèèke eci. Twàlukilàayi, twàngatàayi cyena-bwalu cyètù cyà Loomò 3.4 nè: “Dìyì dyà muntu yònsò diikalè mashimi, kàdi Dìyì dyà Nzambì diikalè Bulelèlà.”

⁶⁵ Nèmbwejè eci nè mu ndòndò, nè ndi muswè bwà nwènù kutèèleja. “Ciikalèku Nzambì, Bulelèlà.” Twànjàayi kulonda cidi Nzambì mwambè, cidi muntu mukwàbò kanà yònsò ewu mwambè nànsha ciikàle cinyì. Ndi muswè kwangata bintu binaayi bishilàngàne byà ku bìndi mmòna mu Mifundu, bìdi bìshì ebi bidyè ku èkèleeziyà wa Nzambì udi nè mwoyi, nè bishiyè Mvinyò wa Nzambì mucibukile panshi, anyi mushingùke.

⁶⁶ Netwitabè, nwènù ba-Méthodistes nenwitabè, nwènù ba-Baptistes nenwitabè, nwènù ba-Presbytériens, nwènù beena Mpenta, nwènù ba-Nazaréens, nwènù bònsò nudi nwitaba, tabernacle ewu ùdi wítaba nè: “Kùdi cintu cibi.” Nènku twètù, tabernacle, tudi bapùile ànu mùdì bakwàbò bònsò amu, bwalu: “Ewu udi mumanyè bwà kwenza cidi cimpè, kàdi kàyì ucyènza to, kùdiye mmpèkaatù.”

⁶⁷ Mpindyewu twàlukilàayi. Nènku ndi muswè kutèèla bintu binaayi mu dìnà, ànu mùndi mumanyè nè ke mùdìbi amu bilondèshilàngàne nè Mifundu, bìdi bìshì ebi bidyè ku Èkèleeziyà, ku ngiikàdilù Wendè wa kumpàlà, wa ku cibangidilu awu.

⁶⁸ Mpindyewu, cintu cyà kumpàlà, èkèleeziyà wàkatèèkiibwa mu Ditùkù dyà Mpenta. Peetèlò wàkayiisha diyiisha dyà—dyà dibanjija ku mudimu wà dyabanya dyà màpòlomè, pààkalediibwà Èkèleeziyà. Èkèleeziyà wa beena Kilstò

wàkalediibwa mu Ditùkù dyà Mpenta. Nènku pìikalàbi nè Nzambi ngwa kàyì mikàlù, kàyì mikàlù, nè kàyì mwà kushintuluka to, Èkèleeziyà Wendè ùdi nè cyà kushààla ànu mwàkadiYe ku cibangidilu amu. Nudi nwitaba aci anyi? Èkèleeziyà ùdi nè cyà kushààla ànu umweumwe awu mwàkadiYe amu.

⁶⁹ Kàdi muntu mmutelàkàjileKù bintu, mwêlemù èndè muumvwija. Kanùteecikù bwà kuumvwija Díyi dyà Nzambi to. Amba wêwè ànu cididi dyamba. Nànsha Dyòdi diikale bishi, pa nànkù ditèèkè wêwè ànu mu njila wa Dyòdi adi, kwàjiki. Kùshintululu Díyi to. Bible mmwambè, nè: “Mifundu kî nyà didyümvwijila dyà muntu pàà nkààyendè to.” Katwèna nè bukenji bwà kwamba bintu ebi to; bidi bikèngela ànu bwà twètù kuDìbala nè kwamba ànu menemene mùdiDi dyamba amu, nè kuDìitabuuja mùshindù wùmwèwùmwè awu. Nànsha Dyòdi òmwèka dicimbè munyi; Ditàbùùjè, nànsha bishi.

⁷⁰ Cyambilu kî mmwaba wà kwelela bilèlè to. Mmwaba wà meeji matòòke. Ncyèna muswè kwamba eci bwà kwela bilèlè to. Ndi muswè kwamba eci bwà kutèèla cintu kampàndà cìvwàbo bangambile. Yèyè nè, kùvwa mwanètù mukùlumpè wa bafìke lwà mu sud mwàmwa, ùvwa mwambùle Bible, nè mfùmwendè wa mudimu awu ùvwa ùmuseka. Yèyè nè: “Kwèna mwà kuMubala to; udi muMwàmbwile cinyi?”

⁷¹ Yèyè nè: “Ndi muMwambùle bwalu ndi muMwitàbùùjè.” Ke kabingilà kimpè nkòkò aku. “Ncyèna mwà kuMubala to, kàdi ndi mumanyè nè kùdi cintu kampàndà mu Yèyè amu. Ncyà bushùwà.” Yèyè nè: “Ndi mene ngìitabuuja nè ‘cipusu’ cyà pambidi Pààwù aci. Mbafùndepù nè ‘Bible wa Cijila’. Ndi ngìitabuuja Cyòci aci.”

⁷² Yèyè nè: “Cintu kanà cyònsò cìdi Bible mufwànyine kwamba nè enzá aci, ndi ngèèla meeji nè udi mufwànyine kucyènza?”

⁷³ Yèyè nè: “Èyowà’s, mukalenge. Wèwè mucibalè mu Bible, mèmè nèncyènzè pìikalàci n’Díyi ditùma dyà Nzambi.”

⁷⁴ Yèyè nè: “Kàdi bu mèmè mwà kubala mu Bible awu, nè kukwambila nè Mukalenge mwambè bwà wêwè kutùpika kupicila mu cimanu aci, cimanu cinène cyà mabwe aci? Mmunyi mùdiku mufwànyine nànsha byà munyi kutùpika kupicila mu cimanu cyà mabwe kamùyi disòsò?”

⁷⁵ Yèyè nè: “Wèwè mubale cyòci aci mu Bible, nè Mukalenge mùngambile bwà kutùpika, Yèyè mmufwànyine kwikala nè disòsò mwòmù pangàfikàku.” Nènku aci’s ncyà bushùwà.

⁷⁶ Nzambi mmwambè nànkù, nànsha Cyòci cìmwèka cyà macimbu bishi, wèwè udi wela cidya kumpàla pa Cyòci apu. Mbulààlè kùdi Nzambi bwà kutàbaleelaYè bìdi bishààle, abu mbwalu Bwendè. Bwèbè wèwè mbwà kwela cidya.

⁷⁷ Mpindyewu cìmwè cyà ku bintu byà kumpalà bîndi njinga kwakula neenù bwà tusunsa tukesè etu. Paanyimà pàà twètù bamanè kujandula nè cishìmikidi cìdi nè cyà kwikala cyà ku cibangidilu, cìdi nè cyà kwalukila ku cishìmikidi, cìdi nè cyà kwalukila ku mwaba wùvwàci Mwonji wà mvinyò aku. Cintu kampàndà cyòci kaciyi cìmpè kùdici to, nè Mwonji wà mvinyò kawüyì wènza mudimu bîmpè to, twàlukilèbi bwà tükajandulè cìdi kaciyi cyènda bîmpè nànsha.

⁷⁸ Mpindyewu, cìmwè cyà ku bintu byà kumpalà bîndi njinga kuteela, ncyà nè cintu kampàndà ncyumùke mu èkèleeziyà wetù, cìmwè cyà ku bintu byà mushinga, n'Diitabuuja. Bantu kabèena nè Diitabuuja leelù ewu bu mwàkadibo naadi mu ditùkù adi amu to. Mukùmbi wà yelèkè wà mùshindù kampàndà, wà mùshindù kampàndà, mmubwelè kàdi kudyà kubùtula nshinga wa Mwoyi wà Diitabuuja. MbaDishintùlùle. Leelù ewu diitabuuja dyàbò didi dishindameena pa èkèleeziyà munène wa—wa dingumba dyà mùshindù kampàndà. Kàdi Yudà wàkatwàmbila, mu Yudà mvensà mwi³. Wàkamba nè:

Bananga, . . . ndi mudifile nè lùkàsà lónsò bwà kunùfundila bwà lupàndù lwètù bónsò, bivwa bikèngediibwa bwà mèmè kunùfundila . . . (Ndi naaCi kaaba aka kumpalà kwànyì.) . . . nè bwà kunùkànkamika bwà nè bivwa bikèngela nwènù kulwangana mvità yà kashèndèndè bwà diitabuuja (kí ndiitabuuja kampàndà to; Diitabuuja adi) dyàkapèèshiiibwà bansantu musangu wùmwe cyendèlèlè. (Aci's cìvwa mbidimu makùmi àsàtù nè bisàtù kumpalà kwà cyòci eci, Diitabuuja edi kufidiibwa.)

⁷⁹ Mpindyewu, kí . . . Bantu bàdi bàmba nè: “Kaa, Aci's cìdi cìbèngangana nè diitabuuja dyànyì.”

Kùdi Diitabuuja ànu òmwèpelè. “Mukalenge umwèpelè, Diitabuuja òmwèpelè, nè Dibàtiiza òmwèpelè.” Udi mufwànyine kwikala nè diitabuuja kampàndà, kàdi tudi baswè Diitabuuja mene adi. *Kulwangana nè mwètù mwónsò*, mbwena kwamba nè: “kukòkangana bwà,” biimanyine kuulu, “kwimanyina kuulu bwà.”

. . . kulwangana nè mwètù mwónsò bwà diitabuuja dyàkafidiibwà kùdi bansantu musangu wùmwe cyendèlèlè.

⁸⁰ Bààkabiiikiidibwa nè mbasantu díbà kaayì? Pààkajidiibwàbo. Nyumà Mwìmpè wàkabàjidila. Bààkabiiikiidibwa nè mbasantu. Mpindyewu Yudà ùdi wàmba nè: mwanèètù wa balùme, mwanààbò nè Yesù mukwà mamwèndè nè: “Ndi muswè bwà nwènù kulwangana kashèndèndè mvità bwà Diitabuuja dyàkafidiibwà kùdi

bansantu musangu wùmwè cyendèlèlè. Kanùlekedikù Diitabuuja adi dimata nànsha.”

⁸¹ Nè Diitabuuja dyà bansantu kadivwa mu twitabàayi to, kî mmu mângumba to, kî mmu nzùbu yà èkèleeziyà to, kî mmu diswikakana to, kàdi divwa mmu Bwikadi bwà Nzambi udi nè mwoyi. Bàvwa nè Diitabuuja dyà kwondopa babèedi, kwipata baadémons, kwenza bishimà. Milayi minène yònsò yàkenzà Yesù ayi, èkèleeziyà wa kumpalà awu wàkashàala mukwàte ku Cyôci aci. Cìvwa shinga wa Mwoyi.

⁸² Tèelejàayi apa. Tèelejàayi nè ntèmà cìndi muswè kunwàmbila eci. Bwikadi bùdi ànukù díbà dyònsò bwà Nzambi udi nè mwoyi bùdi nshinga wa Mwoyi wà èkèleeziyà kanà yònsò anyi musumbà kanà wònsò wà bantu, Bwikadi bùdi ànukù díbà dyònsò bwà Nzambi udi nè mwoyi bwà kukumbaja, nè kwenza, nè kwenza maalu, nè kwikala nè mwoyi pàmwè nè bantu mwàkenzàYe ku cibangidilu amu. Piikalà Bwikadi bwà Nzambi udi nè mwoyi bwàkatwàla mpenta nè bukòlè, nè bimanyinu, nè maalu à kukèma, butwàle cisàmbà cyùle tèntè nè Butumbi bwà Nzambi mu mùshindù wà nè bàakeela mbilà nè kwakula mu myakulu mikwàbò, nè kuya nè kafwila bwà Diitabuuja, tulwanganàayi nè mwètù mwònsò bwà Diitabuuja adi too nè pàatusuulula lufù. Kulwangana nè mwètù mwònsò bwà Bwalu abu. Katwàdyàkudyàku cibàngà to, pa kubala kwà mikàndà to, kwangata tèòlòjì kampàndà mukwàtakaja kùdi bantu to. Katwàdyàkudya cibanga to, pa twitabàayi kampàndà anyi pa mikàndà kampàndà yà disambila, anyi cintu kampàndà cikwàbò cìdì muntu kampàndà mwambè.

Diitabuuja dyànyì kî ndiibakila pa kantu
nànsha kàmwè to
Ànu pa Mashi à Yesù nè bwakànè;
Byònsò bìdì binyùngùlùkile musùùkà wànyì
bìdì byùmuka,
Dìbà adi Yèyè ke ditèkemena dyànyì dyònsò nè
ciikishilu cyànyì.

Bwalu pa Kilistò, Lubwebwe lushindàme,
mpàndì mwimàne;
Myaba mikwàbò yònsò nduntekà.

⁸³ Katwèna nè twitabàayi to ànu Kilistò, katwèna nè mukenji to ànu dinanga, nè katwèna nè mukàndà to ànu Bible. Kakwèna mikàndà yà twitabàayi to! Bikèngela Bible àmbè cyôci aci. Kabyèna bikèngela ànu bwà Bible kuCyàmbe cyanààna to, kàdi ùCyàmbe musangu wònsò ànu mùshindù wùmwèwùmwè awu, ùdi nè cyà kuCyàmbe kubangila ku Genèsè too nè ku Bwàkabuulwibwà. Cìdì nè cyà kuya mu kasunya kònsò, nè kubwela mu citùpà cyònsò cyà Dìyì. Kabiyi nànkù to, díbà adi ndi nè dyumvwija dyàCì dibi, bwalu Nzambi kèna mwà kwela

Díyì Dyèndè Yèyè mwinè mpatà to. Dyòdi kadiyì dyàmba cintu cimwècimwè aci kùdi kalanjilanji kònsò to!

⁸⁴ Piikalà mutèèlu ewu nùku, mmuluka nè mândà àmwèámwè, ke cidì ciwènzà cidìwu eci. Ke cidì ciwènzà mutòòke.

⁸⁵ Ke cidì Èkèleeziyà ncyòci aci. Byòbi nè cyà kwikala Èkèleeziyà mutòòke, mulediibwe cyàkàbidi, kàyì katòba, kàyì mufudi to, ùdi nè cyà kwikala muluka nè mândà à mùshindù wùmwèwùmwè awu àkatwàdijàye naawù, mu Ditùkù dyà Mpenta, dilabula dyà Nyumà Mwimpè, diikale dilakuka kapyà nè dipeepa. Kwènà mwà kusàkidilakù katùpà kàà cilàmbà cibolè to. Kwènà mwà kusàkidilakù kapese kàà mufuku wà cikùnyi to. Kabyàkukùmbanakù to. Necicinyangè.

⁸⁶ Kaayelèkè kakesè kàà kale kàà mùshindù kampàndà nkabwelè nè kadyè Diitabuuja adi. Bàdi bàjuukila kuulu bàmba nè: “Ndi ngiitabuuja èkèleeziyà wa cijila. Èkèleeziyà wa cijila wa Kàtòlikè wa cyena Loomò, ndi ngiitabuujamù.”

⁸⁷ Ndi ngiitabuuja Yesù Kilstò, Mwànà wa Nzambì. Ndi ngiitabuuja nè Yèyè ùdi umweumwe awu makèèlèlè, leelù, too nè kashidi, nè Diitabuuja nè Bukolè bwà dibìikà Dyèndè dyà ku lufù bùdi nè mwoyi munda mwànyi leelù ewu. Bwalu Yèyè ùdi nè mwoyi, mèmè pàànyi ndi nè mwoyi. Kí mbwà twitabàayi kampàndà to, kí mbwà dingumba kampàndà to; kàdi mbwalu Kilstò ùdi nè mwoyi. Nè mèmè ndi munda mwà Kilstò, ndi nè mwoyi ku Yèyè, nè pàmwè Nèndè, nè ndi nè mwoyi munda Mwèndè. Nè Mwoyi Wèndè ùDilukakaja bu tujilu munda mwànyi. Byòbi kabiyi nàнку to, díbà adi ncyèná mwà kudibìikila nè ndi Wèndè nànsha. Yèyè kènà wàngata ànu mutù wànyi to; Ùdi wàngata mwoyi wànyi, dinyungakana dyànyi, bintu byànyi byònsò, nè ùDilukakajamù bu mánà mu cilàmbà.

⁸⁸ Ùdi ùDilukakaja mu Díyì. Díyì kadyèna mwà kwamba cintu nànsha cimwè, mwaba kampàndà, nè cintu cishìilàngàne mwaba mukwàbò ewu to. Nè ndi mumanyè nè nCifùnda mùshindù awu. Ncifùnda mùshindù awu bwà kiipàcilà kampàndà. Yesù wàkamba nàнку, nè wàkasàkidila Nzambì, bwà nè Yèyè—Yèyè ùwà “mucìsokòke ku mèsù kwà beena meejì nè badimùke, kàdi kucibuulwila bàna bu aba bàdi baswè kuyiila.” Ke kiipàcilà kàà Nzambì mu kwenza kwà nàнку. Yèyè . . .

⁸⁹ Bwà cinyì Yèyè wàkalekelakù ngènzàmpèkààtù ùlwa? Bivwa bikèngela bwà kulekelaYè ngènzàmpèkààtù ùlwa, bwà kiipàcilà kàà Yèyè kwikala Musungidi. Yèyè’s mmunène kutàmba mpèkaatù. Yèyè . . . kabivwa bikèngela kwikalaci mpèkaatù to, kabivwa bikèngela bwà kulekelaYè Sàtaanà wènza mpèkaatù wa kumpàlà awu to. Kàdi cyàkafikisha Sàtaanà bwà kufùka mpèkaatù wa kumpàlà, anyì kunyangakaja bwakàne, kubùvwija mpèkaatù, cyàkenzelàye nàнку, mbwà Nzambì wàmòna mwà kwikala Musùngidi. Wàkangishila bwà muntu

cikufikisha ku dipeta bilòòtálòòtà. Wèwè ùtùpika ucibìikila nè ncikèènà-kumòna.

⁹⁷ Kùdi cikèènà-kumòna cilelèlà, cishùwashùwàlè cyà Nzambi. Cyà bushùwà! Nzambi ngudi mucilayè. “Yesù Kilistò umweumwe awu makèlèlèlà, leelù, too nè kashidi.” Yèyè ùdi wènza nànkù, nè kacitukù cìpangila nànsha. Bible mmwambè nè: “Kwòkò kwikàle muntu munkaci mwènù, udi wa nyumà, anyi mupròfetà, nènku yèyè awu àkulè; nè cidiye wàmba aci, cyòci cyenzèke, díbà adi nùmutèèlejaayi, bwalu Ndi nendè. Kabiyi nànkù to, kanùmutèèleji to, bwalu yèyè mmupròfetà wa mashimi.” Nzambi kèna mwà kushima nànsha. Nzambi ùdi wàmba bulelèlà, díbà dyònsò. Bìikalè nànkù. Mpindyewu tudi tusangana nè aci ncilelèlà. Kùdi bintu abi bìdi. . .

⁹⁸ Tàngilàayi Pòlò, pàvwà kuntu kwàka dilòòlò adi, ditèkemena dyònsò dimanè kuya, dyabùlù ùseka nè disànka dyònsò, ùkenya ku mènù misangu wònsò wùvwà mavwala àbàndà muulu nè mikenyi yèla nè: “Nèntùkije mùpostòlò awu muntwamu,” kaamàzuwà kakesè kàà kale aku, kaminè màyi. Nè matùkù nè matùkù, munda mwà matùkù dikùmi nè ànaayi à munya nè à bufùku, mìtootò kayiyikù nànsha yìkenka to; nè mùshindù mwìnè wùvwà kaamàzuwà kakesè kàà kale aku katànkakana’s. Yèyè wènda wèndàkana, ùkòka mùnyòòlòlò paanyimà pèndè apu, bwà kuyiisha Èvànjeeliyò. Àlèluuyàh’s wè!

⁹⁹ Kàdi twètù katwèna nànsha mwà kulekela ní nganyì wàkula bwà bwalu bwètù katùyì bataayike bu cyulà munkaci mwà kudyà ntenda. Tutu misangu yònsò ànu twenza maalu à lukutukutu bwà cintu kampàndà. Nè pashiishe twamba nè tudi tulwangana nè mwètù mwònsò bwà Diitabuuja? Branham Tabernacle ùdi nè dikèngela dyà bintu byàbúngi kwanji kuludikiibwabi, dyàmbedi, byà mwomùmwè nè beena Mpenta, nè ba-Baptistes, nè ba-Nazaréens. Ke bwalu kaayi katwèna nè kutùdi tukafika to, katwèna bàà kweyemena nè meeji matòoke nànsha. Twètukù batwilàngàne mpàla nè mpàla nè Cintu aci kuntu kwàka, cìdi cìtùvwija katùyì mwà kunyungishiibwa to, misangu yònsò tudyunda ànu mu Nzambi, Diitabuuja dyàkapèèshiibwà bansantu musangu wùmwè cyendèlèlè.

¹⁰⁰ Hazilà wà kale awu wàkabwela, nè yelèkè, kàdi kucìdya cyònsò. “Matùkù ònsò à bishimà àkaadi mamanè kupita. Kabyèna bikèngela bwà nwènù kwenza *Cikampàndà* to. Kabyèna bikèngela bwà nwènù kwenza *Cikansanga* to.”

¹⁰¹ Piikalàbi nè Nzambi wàkapàtula ditàmbà Dyèndè dyà kumpàlà ku Mwonji wà mvinyò awu, òvwà ditàmbà dyà mpenta, nè bukolè, bikèènà-kumòna, mabuulula, dyondopa, dijidiibwa, Nyumà Mwìmpè, ditàmbà dyàlondà nedìikale cintu cìmwècìmwè aci. Ncyà bushùwà nè ke cìikalàku. Musangu wònsò wikalà. . . musangu wònsò wikalà Mwonji wà mvinyò awu mwà kupàtula ditàmbà, nedìikalè menemene ànu bu edi

divwàku kumpàlà adi. Nwènù... Ànu bu mûmwà mwambe dilòlò dishàale edi, pâmvwà ngàakula nè kasumbù kàà bânà bèètù nè: kanwèna mwà kufikisha mwonji wà tumuma twà mvinyò ku dikwàmawù mawòji nànsha. Kwèna mwà kufikisha mwonji wà mawòji ku dikwàmawù tumuma twà mvinyò to. Aci's ncilelèlè. Cyònsò cidì mwoyi mu mwonji wà mvinyò awu aci, wùdi wùcìpàtula.

¹⁰² Nènku pìikalabi nè Kilistò ùdi mu Mwonji wa mvinyò awu, nè Mwoyi wà Kilistò mwikàle mu muntu awu, neyikalè bu Yesù, neàkwamè mamuma Èndè. N'Nyumà Wendè. Kèna mwà kwenza cìngà cintu to ànu kwenza nànkù. Bikèngela àtwalè Mwoyi awu, bwalu m'Mwoyi wùmvwèmwè awu. Kwèna ànu mwà kupàtula cintu cikwàbò nànsha cìmwè to. Nedyènze maalu bu Yèyè. Nedyàkule bu Yèyè. Nedyèndè bu Yèyè. Nedyòndope bu Yèyè. Nedimòne bikèèna-kumòna bu Yèyè. Nedipatulè ànu menemene Mwoyi Wèndè, ànu menemene, musangu wònsò, bwalu Didi Mwoyi Wèndè.

¹⁰³ Wèwè udi ànu cizubu cyanààna. Muntu ùdi ànu bu mulonda wà màyi. Yèyè kí m'Màyi to; ùdi ànu mulonda cyanààna. Pàtula ànu Màyi munda mwèndè, neàkwatè dimòmà. Èè, ke lutàtù lùdìku leelù ewu ndwòlò alu. Kùdi bààbùngì menemene bàà kutùdi munkaci mwà kukwàta dimòmà, bàvwà kale wàwa benzè dilabula. Lekèlè Màyi àtuute nkòkà, ke cidì cilamà nshinga wa Mwoyi ncyòci aci.

¹⁰⁴ Ngàkuumvwa muntu kampàndà ùyiisha musangu kampàndà, wàmba nè kùvwa ngulube ùdivwànda mu bitoci, ùvwija màyi wònsò bitoci. Cintu citàmbe bwìmpè... Bible ùdi wàkula bwà bwalu abu. Pàtula ànu ngulube awu mu bitoci. Udi upweka lwà kwìnshì eku, kasùlu kimpè, nè lwà kwìnshì eku mwaba kampàndà kwikàle tusùlu tunène tùpàsàlala, kuulu ku mukùnà kwàka; màyi ònsò àdi nè bitoci, mbitàmbe bwìmpè kupàtulumu ngulube, nànkù ke màyi awu kutòkeshiibwa.

¹⁰⁵ Kùdi bintu bùngì cyanààna bìdi bikèngelà bwà twètù kupàtula, kumpàlà kwà Màyi kufùmina mu Mpokolo mùle tètè nè Mashi makòka mu mijilu yà Èmanùwèlè, mùdi bangènzàmpèkàatù biinyija mwìnshì mwà nkwaka awu bàjimija dikeji dyàbò dyònsò dyà dipiilà, dibènga kucyùka dyà myandà nè dyela dyà mbilèlèlè, nè bikwàbò.

¹⁰⁶ Bambi dikùmi nè bàsambòmbò, bwalu bàdi bìitabuuja... Bàvwà bèèla meeji nè mvwa mwitàbùùje nè Nzambi ùvwa ùlama Èkèleeziyà Wendè nè ùlaminyina Èkèleeziyà Wendè. Mufùndu mmwambè nè: “Ewu udi utèèleja Dìyi Dyànyi,” kí ng'ewu udi wenza bu nè ùdi ùDitèèleja to. Awu's ke udi Nzambi mutàbèèje mèsù nè mukàngùle macì, bwà kuumvwa. Muntu nànsha umwe kèna mwà kucyenzaku to ànu Nzambi mumutàbèèje mèsù nè mumukàngùle macì. “Ewu udi utèèleja Mèyi Àanyi nè wìtabuuja Ewu udi muNtùme, ùdi nè Mwoyi wà kashidi, nè

kàadyàkupicilakù ku Cilumbulwidi to, kàdi ùkaadi mumane kuumuka ku lufù muyè ku Mwoyi.” Ncinyi cyàmwenzekelà? Nzambì mmushimè anyi m’Mwambè Bulelèlà?

107 Mmuntu mmubîngè, anyi nè: “Kaa, udi mwà kupeta Nyumà Mwîmpè nè kusungidiibwa, nè màalabà udi mwà kujimina nè kuya mu ifernò” anyi? Kanwìtabuuji kù bintu byà budingidingi abi to. Aci’s mmafi.

108 Paùkàadi ànu mulediibwe cyàkàbìdi, ngiikàdilù webè yònsò nkòong mmulongolola bishiilàngàne. Muntu yèyè ànu mukùnyiiibwe mu Kilistò, nè mukòwòlwèle Mwoyi wà Mwonji wà tumuma twà mvinyò, ùpicila mu yèyè, yèyè kàadyàkukwàmakù kàbìdi mawòji to. Udi mufwànyine kumujiingila òmwè pambidi, kàdi yèyè mmumanyè nè cintu kampàndà ncibi. Yèyè neashaale mulàale mwaba awu ùtwa mikèmù too nè mùumushiibwàci kùdiye. Mbujitu bwàbùngi bikolè kùdiye; cidi cimwinyika pabwipi menemene nè buloba. Yèyè ùdi ùjinga bwà kukola. Kwèna mwà kulamika diwòji ku Mwonji wà tumuma twà mvinyò nànsha.

109 Mònaayi’s. Kaa! “Kulwangana mvità bwà Diitabuuja,” cìvwa cyùmviwija nè, “kulwangana mvità nè mwètù mwònsò.” Kì ng’ànù kulwangana pàtupù to, kàdi, “kulwangana mvità nè mwètù mwònsò,” pankaci pàà Mwoyi nè lufù. Netùtùpikè kuya ku cikwàbò. Udi mwà kushàala ntàntà mule pa aci nànkù.

110 Cintu cidi cilondà citùdi baswè kwamba, ncyà nè, dinanga dyà bwànà bwètù ndimana kudiibwa ku mwonji wà mvinyò. Dinanga dyà bwànà bwètù! Yesù wàkamba nè: “Ku eci bantu bònsò nebàmanyè nè nudi bayiidi Bàanyi, panùdi nè dinanga, muntu bwà mukwèndè.”

111 Èè, mpindyewu twàngatàayi ànu cileejilu. Muntu yèyè kàyi wìtabuuja mùmwè naanyi, nènyè ànu mu disangisha dyèndè àmu nè nènyiishè nendè, nyiisha ànu cidiye wìtabuuja aci, nè kutùngunuka nè kulekela biya ànu nànkù, bwalu ndi mumurangè. Ku mamuma àbò nkunwàbàmanyinà. Bòbò kabayi bàCìitabuuja to, nè kabayi nè dinanga dyà bwànà bwètù to, bàdi bàkùluka, bàbènga, bàdishinda nè: “Mémè ncyàkwikala Naaci bwalu to.” Bwà cinyi kwèna ulwa kùndi bwà kuyiikila naanyi pa Bwalu abu? Kwèna mumanyè cìndi mémè ngiitabuuja to. Nwamònu anyi? Bìdi ne dishilàngàna kaayi’s, nànsha bishi, bwà cìndi mémè ngiitabuuja? Bwalu’s mbwà Ùndi mémè ngiitabuuja: Yesù Kilistò. Kacya ncitukù mwanji kushiya disangisha, too nè leelù, nè mwenya mubi to, ku dyànyi pàanyi dimanya. Kàdi, nudi numòna’s, dinanga dyà bwànà bwètù dikaadi diimansha dyònsò.

112 Nènku Pòlò wàkacimòna, mu Kolintò wa Kumpalà 13, kwambayè nè: “Dinanga dyà bwànà bwètù ditùngunukè.” Kàdi dinanga dyà bwànà bwètù dyàkuumushiibwa. Mpindyewu tàngilàayi. Musangu wònsò . . .

113 Mpindyewu, tèelejààyi nè ntèemà mpindyewu, tudi tubwela mu byàkudyà bikolè. Musangu wónsò wùdì dyabùlù ùtùùla cintu kampàndà ku mucì, netwámbe nè bizubu, cìshì cìdì cìdya bizubu abi, ùdì ùcìjìngila mukùsù wà kale wà dikwàtakaja dyà bantu, bwà kwangata kaaba kààCì. Jìngilàbi mukùsù ku mushimì wà màyi à mucì, kawàkutùma màyi muulu mu bimuma byà mucì awu to. Kawàdyàkukwàma cimuma nànsha cìmwè to. Neàlukile ànu kwìnshì mu buloba. Nènku ke bwà cinyì, leelù ewu, katwèna mwà kupeta ditàbuluja mu ditùkù dyètù edì to, bìdì ànu díyì diswìka dikwàtakaja kùdì bantu dipìte búngì. Nshinga wa Mwoyi kadyàkwendela pa mukùsù wà kale awu to. Newùmacishè màyi, Mwoyi newùmatè dyàkámwè ùya mu buloba. Ke bwà cinyì matàbuluja ètù àdì àpangila.

114 Ànu mwàkamba Billy Graham ditùkù adi nè, ùvwa mu Angleterre, mùvwàye mwènzè ditàbuluja dinène. Pa mwaba mene wùvwàye ùyiishila, byàkamukèngela bwà kuumushayè mukàjèndè mu lupangu amu bwalu balùme nè bakàjì bàvwa bèndela masandi ànu pambèlu mu mpangu amu. Bwalu bùvwa cinyì? Bikùsukusu bikwàtakaja kùdì bantu pamutù pàà cibubu citòlwesha kùdì Nzambi. Abi kabyàkutwàlakù Mwoyi nànsha.

115 Èkèleeziyà udi mujìngila ku twitàbàayi kampàndà mukwàtakaja kùdì bantu, kàakutùma Bukolè bwà Nzambi mu matàmbà to. Neámbe nè: “Matùkù à bishimà àkaadi mamanè kupita,” nè ùCìmacisha panshì. Amen. Ndi mumanyè nè nudi nwela meeji nè ndi mupàle; kàdì, byòbì nànkù, ndekèlaayi, ndi ndyùmvwa bimpè mùshindù ewu. Nwamònu anyì? Necìmacishè Díyì dyà Nzambi.

116 Nzambi Yèyè wàmba kaaba aka nè: “Mémè ndi Mukalenge. Kacya ncitukù nshintuluka nànsha.”

117 “Èè, Yèyè mmushintùlùke mu ditùkù edì,” mùdì mukùsù awu wàmba. ùCìmacisha panshì. Mwaba wàkabangàci dyàmbedi wùvwa mmu cikondo cyà ku cibangidilu, pàvwàbo kabàyi nè màngumba to, kàdì muntu mmuteetè bwà kwalujulula bwànà bwètù ku màngumba. Dinanga dyà bwànà bwètù ndyumusha bwà màngumba.

118 Ndeejàayikù cikondo kampàndà cìkaadiku Nzambi mupetè bulongolodi anyì dìngumba kampàndà, nè kacya mubwejè Èkèleeziyà Wendè mu dìngumba, anyì mene dìngumba kampàndà dikaatùku dijuukè kacya kadiyì didishinde nè kadiyì dijuukè kàbidì. Mpindyewu, ndi munkaci mwà kubala kacya ànu ngàfùma kuntwaku, pa cyena-bwalu ciinè eci. Ntu mubalè *Mukàndà Wà Fox Wà Bafwile Dìtabuuja*. Ntu mubalè mifundù yà ku cibangidilu yà Josèphe. Ntu mubalè mukàndà wà *Baabùlònà Yìbìdì* wà Hislop. Ndi mubalè *Bikondo byà ku Cibangidilu* wà Pember, kaa, nè *Baataatù bàà ku Nicée*, nè kumpàlà menemene kwà Nsangilu wa Nicée, paanyimà pàà Mpenta. Nè kakùtu kacya dìngumba ditù Nzambi mulongòlòle

mu Bible to. Dìbà adi patwàkalongolola nè kwenza màngumba, twàkapàtuka mu diswa dyà Nzambi.

¹¹⁹ Yelèkè, udi ùbìikidiibwa nè “dingumba,” wàkadyà kubùtula cizubu cyà ku cibangidilu cyà dinanga dyà bwànà bwètù, nè kudivwija dingumba, ku ditwàla mukùsù nè kuwùjìngilakù. Nè Mwoyi wà Nzambi wùdi wùbàndila mu miji mwab’ewu, Muji nè Mùtòlokù wà Davidi, pàakabangaWu kukola kupicila ku Nyumà Mwimpè; pashùshe dingumba kwambadi nè: “Matùkù à bishimà àkaadi mamananè kupita. Kabyèna bikèngela bwà nwènù kwakula mu myakulu leelù ewu to. Cintu pààci nè ndibàtiyina dyà Nyumà Mwimpè kacitukù to. Kakùtu dyondopa dyà kùdi Nzambi to. Aci cìvwa bwà cikondo cìkaadi cipite. Ncimanè kupita, kùkaadi ntàntà mule.” Kàdi matàmbà ngòwò aa apa, àkèngakana, mamuma awu.

¹²⁰ Muci mwimpè, wà dikàndà tumatuma kawèna wùkèngela bwà kuwùpwidijilabò bwanga to. Bwà cinyi tudi tupwidija nè tupwidija ànu kupwidija bwanga, bwà ditàpila dyà twishì? Citùdi tucyènzela ncinyi? Mbwalu mucì awu kawèna nè mubidi tumatuma to. Mbwà cinyi bùdiwu kawùyì nè mubidi tumatuma? Twitabàayi nè màngumba mbidyè nshinga wa Mwoyi úvwamu awu. Kakùyì mpatà to! Ba-Méthodistes, ba-Baptistes, ba-Presbytériens, beena Mpenta, bàakadyà nshinga wa Mwoyi ku mucì awu, bàteeta kupingajapù dingumba kampàndà, bwà kubweja bantu bònsò mu cidiiidi. Nzambi kí mmuswè bwà twètù kwikala baswikakane pàmwè mu cidiiidi nè twitabàayi to. Tudi baswikakaja pàmwè kùdi Nyumà Mwimpè, wa ku cibangidilu wa Nzambi awu, mupàtule mpèkaatù munda mwà mwoyi wètù, nè mutúvwije bònsò umwe mu Kilistò Yesù. Aci’s ncilelèlè, mwanèètù wa balùme. Aci’s ncilelèlè, mwanèètù wa bakàji.

¹²¹ Cyàkabanga mu bikondo byà ku cibangidilu paanyimà pàà lufù lwà Kilistò, nè dibìikà dyà ku lufù, paanyimà pàà lufù lwà bàpostòlò. Paanyimà pàà bidimu nkàmà yìsàtù, kubwejabò Nsangilu wa Nicée. Apu ke pààkenzàbo bulongolodi bwà kumpàlà, bùvwà èkèleeziyà wa Kàtòlikè abu. Mbwena kwamba nè, *kàtòlikè* mbwena kwamba nè: “wa buloba bujimà.” Mu Kàtòlikè, nè èkèleeziyà awu mmwàkapàtukilà Luther; mu Luther, kupàtukamù Wesley; mu Wesley, kupàtukamù Mpenta. Too nè kwìnshi, tujila tukesè—tukesè twà mu nyùngulwilu, tukwàbò twà tukesè etu, bu mùdi, kaa, ba-Nazaréens, ba-Pèlerin de la Sainteté, nè bakwàbò, ba-Baptistes, nè byònsò abi. Bònsò bwàbò è kupàtukamù, buludi ànu mu ngenzèlù yimwè ayi, dingumba. Pàdi Nzambi ùpèèsha èkèleeziyà dibènesha, anyi kasumbù kàà bantu, nè lùkàsà lwònsò bàdi bàdyèla mu kaalupangu kakesè, nènku apa’s ke pàdibo bàpetela kààbò kaaba kàà kwimanyina. Nzambi mmuswè kuupula lupangu lwònsò.

¹²² Ndi mvùluka cikondo cingàakayà mu Wesètè dyàmbedi. Bivwa mbikondo byà didima nè tutumbà, mu Kansas, nè bàvwa

bàkùnàmù blé. Mvwa mwà kumòna balami bàà ngombe bàà kale abu bàvwà kabàyi bamanyè cintu nànsha cimwè pa bìdi bitàngila katumbà anyi—anyi ní ncinyi cyònsò, anyi didima dyà blé. Cyònsò cidìbo bamanyè nkudiisha ngombe. Ke twétu kubanga kubweja màshinyi, nè kwenza byalu byà kunàyila golf, nè kuvwàla tùpanù tukesè twà tushikidile mu binù tùvwàbo bàvwàla bwà kunàya naatù golf atu, nè bintàkanyì byònsò byà mùshindù awu. Mvwa mwà kumòna bantu bàà kale abu nè nsuki mile, mitòoke milembèlèle mwínshì mwà cifulu cyàbò, pa kubàmòna bàlwa nè biswìkì nè bitolweshi byà blé, nè bintàkanyì byà mùshindù awu, ùdi wela dikàsà dyèndè mu cisòmbedi cyà kabalù, nè ùkoka cifulu cyèndè. Kwela mpangu mu mwaba awu; kàvwa mwà kucitwàla to. Kàvwa mumanyè cintu nànsha cimwè pa bìdi bitàngila kwediibwa mu lupangu to. Úvwa mu cikumbi amu, nkàayèndè nè Nzambi. Mvya mimulembèlèle mu cifulu mùshindù awu; udila mwadi, nè binsònji. Údi ànu ùcikòka, wàmba nè: “Ncyèna mwà kutwàla bintu ebi to.” Údi ùtuuta nyama mikàbà ùya mutàngile kùdì dìbà dibwelela.

¹²³ Nzambi àtùkwàcishèku leelù ewu bwà twétu kwikala nè beena lwendu bìikalà kabàyi mwà kutwàla kwikala balamina mu lupangu kùdì dìngumba nè twitabàayi to, nè kwendesha kabalù batàngile kùdì dìbà dibwelela; nè Diitabuuja didì kadiyi mwà kunyungushiibwa nànsha, dyàkapèèbwà bansantu musangu wumwèpelè bwà kashidi adi; nè dinanga dyà bwàna bwétu didì dishimbula twitabàayi yònsò nè mpangu, nè dyàmba nè: “Tudi bânà bàà muntu. Tudi umwe mu Kilistò Yesù. Cyònsò cidì Nzambi wàmba aci, tudi twamba nè ‘amen’ paanyimà Pààci.” Tùpèèshèku bantu bàà mùshindù awu.

¹²⁴ Èyowà, twitabàayi’s! Pashìshe kwenzabo cidìbo bàbìikila nè—nè baa Taatù bàà Kumpàlà kwà Nicée aci. Kudisangishabò, mu cyòci è kwenzabò nsangilu. Mu nsangilu awu mwàkatooyika èkèleeziyà wa Kàtòlikè, udi umvwija nè “èkèleeziyà wa buloba bujimà,” kusunsululabò èkèleeziyà mikesè yònsò yà mu nyungulwilu mùvwà Nzambi ùkwàcila mudimu amu, nè kubènzeja ku bukòlè bwà kubwelabò mu èkèleeziyà ùmwèpelè nè ntèndeleele ùmwèpelè.

¹²⁵ Bàvwa bàtèèka ngombe pa dibòkò dimwè, ngombe pa dikwàbò, kulembeleja nkùrusè kumpàlà kwà muntu, kumwambila nè “mutwè mishiku anyi. . . nè inàmà panshì, bwà kwakidila ntèndèleelù wa Kàtòlikè,” anyi kusàkabò ngombe umwe mu nùnkù, nè mukwàbò awu mu nàka, kàdì è kumukòka bwà kumupanda bipese. Bàngata mukàjì kampàndà nè bàmutwà nsuki mu ntuku wa kabùdimbù, nè kumukonka ní ùvwa mwà kwanyisha bwà kutwà nkùrusè ewu mishiku; anyi ùvwa mwà kucyènza, nè kwìnamina ntèndèleelu wa Kàtòlikè, anyi bàvwa bàtwa mudilu ku nsuki ku mutù wèndè nè bàmwosha butubutu. Bàbàtèèka pa cyoshelu nè bikwàbò byònsò. Kubèèla mu cidìbo bàbìikila nè mukàjì wa cyamu cifiike, bàbàbèla tupòmbo

nè milonda ayi, bàteeta bwà kubàfikisha ku ditwà nkùrusè mishiku, bùupukila cidibo bàbìikila nè “ntèndeleeu wa beena Kilstò,” kàdi kubàvinga kubàshiya ànu lupwishi.

¹²⁶ Mufwile diitabuuja wàkiimana mwaba awu kàyì ùtuuta mupòdi to. Ùvwa mumanyè mwaba wùvwàye mwimànyine. Ùvwa mumanyè nè Nganyì uvwayè mwitàbùùje. Yèyè ùvwa nè bukòlè, mumanyè Cyòci eci nè, Nzambi ùvwa mwà kumubiisha ku lufù ku ditùkù dyà ndekeelu, bwalu Yèyè wàkacilaya. Kumpàlà kwà kwinaminayè ku mukùsu kanà wònsò mukwàtakaja ku byanza byà bantu, wà mishimi yà kale yà manyaanù, mmufwànyine kufwila pa cikuuku. Àlèluuyàh!

¹²⁷ Lekèlaayi mfwilè pa mwaba wùm wèwùm wè ewu. Nzambi wanyi Yèyè kàyì mulwè mu lukòngò lwànyì elu to, nèmfwilè pa cikuuku cìvwà mikùmbi yà yelèkè midyè aci, mwikàle ngiitabuuja nè Yesù Kilstò nè Èkèleeziyà Wendè nè Dìyì Dyèndè bàdi uwemwewe awu makèèlèlè, leelù, too nè kashidi. Ndi mufwànyine kwikala nciyì mukùmbàne bwà kucipàtùla patòòke, mu matàmbà ònsò aa to, bwalu mushimi wà màyi wà kale wùdì mwab'ewu ewu, wà dìngumba nè twitabàayi, ùdi ùnkòsa nè ùdekela pànshì bu cìlungà cyà mudilu. Aci ncifwànyine kwikala cilelèlè. Kàdi mèmè nèngiimanè nè lulamatu ku cikuuku nè kwela mbilà, nè: “Dìbà nedilwe, Nzambi nèalujululè Èkèleeziyà Wendè, too nè mu ngiikàdilù Wendè wa kale.”

¹²⁸ Eci cidi mwà kutàpangana ku mwoyi. Cintu ciisàtù. Ncyèna muswè bwà citapè to. Tàngilàayi wùm wè wa ku mishimi minèye yà màyi yidibo bakòse ayi. Nè mu cyòci cikondo aci cyà bulongolodi, ke cyòci cyàkakòsà mushimi wà màyi awu, ànu kwìnè kònsò aku. Cyà kumpàlà, bu nè bàvwakù nè dinanga dyà bwànà bwètù munkaci mwàbò kùdì muntu nè mukwèndè, nùnkù kabàvwakù mwà kwikala dìjinga nè bulongolodi to. Nènkù dìbà adi pàakamònàbo nè kabàvwa mwà kwikala nè. . . Kabàvwa nè cyà kupeta dinanga dyà bwànà bwètù, anyì bàvwa bèèla meeji nè kabàvwa naadi to. “Aba bàdi bindila Mukalenge nèbàvwijulule makàndà abo mapyàmàpyà.” Pamutù pàà kwangata Dìyì dyà Nzambi, bàvwa nè bulongolodi kampàndà.

¹²⁹ Luther wàkapàtukila mu bòbò bulongolodi abu. Bidimu nkàmà yitaanu nè makumi àtaanu paanyimà, kupàtukayè. Cyàkenzàye nciyini? Wàkakùdimuka buludì, kwenza cintu cimwècimwè cyàkenzàbo aci. Ànu mwòmò amu ke mwàkapàtukilà Calvin. Ànu mwòmò amu ke mwàkapàtukilà Wesley. Ànu mu Wesley ke mwàkapàtukilà ba-Baptistes, ba-Presbytériens, ànu nànkù too nè ku beena Mpenta. Nè beena Mpenta, paanyimà pàà ba-Nazaréens bamanè kulwa beena Mpenta. Nè paanyimà pàà beena Mpenta, ciikalàku nciyini? Ndi ntèkemena Dilwa dyà Kilstò. Bwalu, beena Mpenta mbenzè cintu cimwècimwè cyàkenzà bakwàbò abu aci.

¹³⁰ Bwàkabuulwibwà 12 ùdi wàmba nè bàvwa mwà kucyènza. Yèyè ùvwa mukàji wa masandi, nè bàvwa bandumbà. Bòbò bàvwa “baandumbà.” Èkèleeziyà wa Kàtòlikè, “mukàji,” mbambè nè yèyè ùvwa “mukàji wa masandi,” mu Bible, m-u-k-à-j-i w-a m-a-s-a-n-d-i. Kolintò wa Kumpàlà 12 ngudi mwambè nànkù. Ke yèyè nè: “bànà bèndè bàà bakàji.” Mpindyewu, kabèèna mwà kwikala bantu balùme to. Yèyè kàakambakù nè “bànà bèndè bàà balùme to.” Yèyè nè: “bànà bèndè bàà bakàji.” Èkèleeziyà mmileejìibwe mu Bible bu bakàji. Nè bànà bèndè bàà bakàji bàvwa bandumbà, nwamònu’s, cintu cìmwècìmwè aci. Wa mùshindù kaayi? Èè, mmunyi, ndumbà? Biikàle bènda masandi à mu nyumà bibengangana nè Dìyì dyà Nzambì. Kacya bààkwàta ku mukùsù wà cyena màngumba pamutù pàà kwimana tèndee nè mwoyi mujimà bwà Diitabuuja dyàkafidiibwà musangu wùmwèpelè bwà kashidi kùdi bansantu, Dìdi dyàmba, pamutù pàà kwalukila nè kwangata Dìyì dyà Nzambì.

¹³¹ Mvwa muyiikile nè nsaserdòsè kampàndà mwaba ewu ànu àbìdì àdì panshi aa. Yèyè nè: “Cìdì Bible wàmba nànsha ciikàle cinyì. Twètù’s ke èkèleeziyà.”

Mémè nè: “Aci’s n’Dìyì dyà Nzambì.”

Yèyè nè: “Tudi bacyènzè.”

¹³² Mémè nè: “Mbwa cinyì ncifwànyine kushintuluka bikolè nùnkù? Kanwenà nè cintu nànsha cìmwè mu èkèleeziyà wenù, cìdì Bible ewu wàmba, cinùdì nulongesha to.” Mvwa mmwambila nè mvwa mubàtìize mwànà wa bakàji kampàndà mu Dìnà dyà Yesù Kìlistò.

Yèyè nè: “Udi mumanyè’s, èkèleeziyà wa Kàtòlikè ùvwa kale wàwa nè ciibidilu cyà kwenza nànkù.”

Mémè nè: “Dìbà kaayi adì’s? Kùdi bwalu-bulonda bwònsò bwà maèkèleeziyà, bündiku mumanyè, búsanganyiibwa ànu mwaba awu.”

Yèyè nè: “Tudi twitabuuja kàtèshismù kèètù.”

Mémè nè: “Kàdi bìshi bwà maalu-malonda?”

¹³³ Yèyè nè: “Katwèna tucyùka cìdì maalu-malonda mambè to. Tudi twitabuuja kàtèshismù.”

¹³⁴ Mémè nè: “Mmunyi mùdì umanya nè kùvwa George Washington nè Abraham Lincoln? Wàmanyi munyi nè kùvwa baataatù beena lwendu?”

“Bwalu tudi twitabuuja bwalu bulonda bwètù.”

¹³⁵ Mémè nè: “Kakwèna mwaba nànsha wùmwè wùkaadiku èkèleeziyà wa Kàtòlikè muvwijìibwe bulongolodi to too nè ku bidimu nkàmà yìsàtù nè makùmi àsambòmbò paanyimà pàà lufù lwà mùpostòlò wa ndekeelu.” Mémè nè: “Nè èkèleeziyà wa Kàtòlikè kàvwa mumanyike to. Kabààkabàtiiza mu Dìnà dyà Yesù Kìlistò to, bwalu bòbò ke bàvwa cishimikidi cyà kumpàlà

menemene cyà kubweja kwà dibàtiiza dyà mashimi. Nè yêyè ùdi. . .”

136 Yêyè nè: “Èè, mpindyewu anjì indilà kakesè.” Yêyè nè: “Twètù tudi nè bukenji. Twètù ke èkèleeziyà awu. Tudi twenza citùdi baswè kwenza aci bwalu Nzambi ùdi mu èkèleeziyà Wendè.”

Mèmè nè: “Nzambi ùdi mu Dîyi Dyèndè, kî mmu èkèleeziyà Wendè to.”

137 Èkèleeziyà yêyè ùbèngangana nè Dîyi, dîbà adi kùdi cintu kaciyi mu cyôci. “Dîyi Dyànyi diikalè dilelèlè, nè dîyi dyà muntu mukwàbò yònsò diikalè mashimi.” Ncyà bushùwà. Dîyi dyà Nzambi diikalè dilelèlè. Kuvwija Dîyi Dyèndè dilelèlè. Alùkilaayi ku Dîyi Dyèndè. Nudi numòna cyàkadyàbo kùdi mukumbi wà yelèkè anyi?

138 Mpindyewu, munkaci mwà cikondo cyà baataatù bàà Nicée bàà ku mbandidilu. Gene, wêwè's udi ufuma kudicibala, wêwè pèèbè. Nsangilu munène wa ku Nicée wàkatwàla dikòkangana dinène, pa bwalu bwà nè: “Kùvwa Nzambi umwèpelè anyi kùvwa Nzambi yisatù; Taatù, mwikàle umwe; Mwànà, mwikàle bàbidi; Nzambi Nyumà Mwimpè, biikalè bàsàtù anyi?” Nè bàakiitaba cyôci aci nè kùvwa “Nzambi yisatù.” Mpindyewu, wêwè kùyì witabuuja aci to, nènku badilèci mpindyewu mene mu Nsangilu wa Nicée, Baataatù bàà ku Nicée. Bàakacyènza nànkù nè: “Nzambi yisatù.”

139 Kùdi Nzambi umwèpelè. Kùdi ànu Umwèpelè. Yêyè ùdi Yehowàh Nzambi, NDI MUNÈNE awu; Alpha, Omega; Cibangidilu nè Ndekeelu.

140 Bàkaadi mpindyewu, bwà kwenzabò nànkù, byàkakèngela bwà kupetabò cintu kampàndà cyà kwenda naaci. Bwà kwenza nànkù, bàakateeta kwamba nè: “Nzambi Taatù, Nzambi Mwànà, Nzambi Nyumà Mwimpè.” Mpindyewu, kakùyì mpatà to, cintu bu nànkù kacitukù to. Kî n'Nzambi yisatù to. Aci's mbumpanganù.

Kùdi midimu yisatù yà Nzambi umweumwe awu. Buutaatù. . .

141 Pàvwà Nzambi musòmbe nkàayèndè, wa cijila; Mikenji Yèndè, bwakànè Bwèndè bùdi bùMuvwija wa cijila. Ûvwa muswè kwikala mu muntu. Ûvwa muswè kukuukwila nè muntu. Ûvwa muswè bwà muntu kuMukuukwilaYè. Bivwa bikèngela bwà kulwaYè kùdi muntu. Nè pashiishe pààkenzàYè nànkù, kufùkaYè; kubwikilayè virgò mutekète nè mundidimbi dinà dyèndè Màriyà. Nzambi, Yehowàh kwenzaYè nànkù awu, nè wàkafùka kabùlù kàà mashi munda mwèndè, Kabùlù kàà Mashi. Kabùlù kàà Mashi aku kàakavudija tubùlù twà mashi, nè kutwàlakù Muntu, uvwa Kilistò Yesù awu.

142 Nzambì wa Bukolè bwónsò, Taatù awu, wàkasòmbela munda Mwèndè. Mu ditùkù dyà dibàtiiza, pààkapetàYe Nyumà Mwimpè mu ditùkù dyàkaMubàtiiza Yone adi, Yone kwambayè nè: “Ngàkatàngila nè kumòna Nyumà wa Nzambì, bu Nkuci, ùpweka ùfùmina mu Dyulu, nè Díyì dyàmba nè: ‘Ewu ke Mwan’Ànyì munanga Mwena munda Mùndì nsànka bwà kusòmbela.’” Yesù wàkamba nè Nzambì ùvwa Nendè: “Mèmè nè Taatù Wanyì tudi Umwe. Taatù Wanyì mmusòmbèle munda Mwànyì.” Kí n’Yesù to, nè mwikàle umwe nè Nzambì; kàdi Nzambì ùvwa munda mwà Kilistò, ùpungisha bàà pa buloba nè Yèyè mwinè.

143 Nènku nwènu bànà bèètù ba-Unitaires, bààbúngì bàà kunùdi bàdi bàpàtuka mu njila mubì panùdi nuteeta kwela meeji nè Nzambì ùdi umwe ànu mùdi munu wèbè wùmwe amu. Yèyè kèna mwà kwikala Tatw’Èndè Sungasunga nànsha. Kèna mwà kwikala nànkù to.

144 Kàdi Yèyè ùdi Nzambì. Nzambì ùdi Yèhowàh, Nyumà awu; Kilistò nguwwa nzùbu uvwaYè musòmbèlemù. Ke díbà adi kufilaYè mwoyi ewu, nè, pààkenzàYe nànkù, kukùùlaYè Mwoyi. Nè kupicila mu Mashi àvwà káyì masopakaja àkeelàYe panshì awu, Yèyè wàkanjidila mèmè, bwà Wàmòna mwà kulwa Yèyè mwinè bwà kusòmbela munda mwànyì nè munda mwènu. Nè Nzambì ùdi neetù. Ke Nyumà Mwimpè nyàwù, udi umweumwe awu, Nzambì ànu umweumwe awu, Yèhowàh Nzambì. “Néngiikalè neenù, munda mwènu mene, too nè ku ndekeelu kwà buloba. Nè bintu bìNdì ngèza, nenùbyènzè pèènu.”

145 Ke mwaba wàkabangilà mukùmbì wà hazilà kudiila awu, nè yelèkè ayi, ùteeta bwà kuvwija “Nzambì Taatù” musòmbè mu Butùmbì, “Nzambì Mwàna” musòmbè lwà ku dyàbalùmè kampàndà didiYe naadi.

146 Dyàbalùmè dyà Nzambì, mùdi Bible mwambè: “Mèmè kutàngila muulu è kumòna Yesù mwimàne ku dyàbalùmè dyà Nzambì,” Filipò, anyì Stèfanò pààkaashiibwàye mabwe apu. Kí mbwena kwamba nè Nzambì ùdi nè cianza cyà dyàbalùmè, nè Yesù mmwimàne pampàla pà cianza Cyèndè cyà dyàbalùmè to. Mbwena kwamba nè Yèyè ùdi mu cianza cyà dyàbalùmè cyà Bukolè, bukòokeshi. “Makòokeshi ònsò mu Maulu nè pa buloba mmaMpèèsha,” mwàkambà Yesù. Yèyè ùvwa mu bukòokeshi. Nzambì ùvwa munda mwà Kilistò. Ùdi munda—munda Mwèndè. Bible mmwambè nè: “Munda Mwèndè mmùdi musòmbèle kaabujimà kàà Bunzambì mu mùshindù wà mubidi.” Paùdi uteeta kwenza Nzambì yisàtù yà pàà nkààyà, udi mumpàngaanù ànu mùdi mumpàngaanù yònsò ewu.

147 Mpindyewu, eci necisaamè ku mwoyi. Ciinâyì. Pàvwàbo nè nzambì yisàtù, bìvwa bikèngela bwà kuleejabò dibàtiiza bwèndè yèyè, bwà nzambì yàbò yisàtù ayi, nànkù ke dyabùlù

kubàfomijayè mèsù, mu Maatàayi 28.19 nè: “Ndàayaaku, nùkalongèshè bàà mu matùnga ònsò, nubàtiiza mu Dìna dyà Taatù, Mwànà, Nyumà Mwîmpè. Nubalongèshè bwà kwenzabo cyònsò cìndi mwenze aci. Mònaayi, Ndi neenù misangu yònsò, too nè ku ndekeelu kwà buloba.” Dyabùlù ngwàkabàfomija mèsù ku Cyòci aci.

¹⁴⁸ Mpindyewu kwàtaayi aci. Mpindyewu mwaba ngwòwò ewu wùndi nè cyà kupoopela musonso, nènku nebisaamèku, kàdi ndi muswè nùtèèlejè. M’Bulelèlè. Nzambi àkwacishèku bwà biikalè. . . Kenketaayi ànu Mifundu. Jandùlaayi mu Bible mwaba wùkaadiku muntu mubàtijiibwe mu Dìna dyà “Taatu, Mwànà, Nyumà Mwîmpè,” nujandùlàyikù mwaba wùmwèpelè wùkaadiku muntu kacya mubàtijiibwe. Tàngilà, wèwè udi wamba nè: “Dyabùlù ùdi mwà. . .” Dyabùlù ùdi wàngata Mufundu awu nè ùWùvwija bu cintu kampàndà cidiWù kawùyì to.

¹⁴⁹ Yèyè kàakambakù cintu cimwècimwè aci kùdi Yesù anyi? “Bàakafùnda nè: ‘Yèyè neatuminè Banjèlò Bèndè díyì, bwà bwalu abu, bwà nè musangu nànsha wùmwè Kùtuuci dikàsà Dyèbè ku dibwe to.’” Yèyè kàakazaazakù dikàsà Dyèndè ku dibwe to. Kàdi dyabùlù ùvwa ùteeta kuMufikisha ku dimòna cintu kampàndà civwà Mifundu kayìyi myambè to.

¹⁵⁰ Ùvwa nè meeji matwè. Ùvwa mùle tètè nè Nzambi. Nzambi ùvwa munda Mwèndè. Nènku Nzambi, mwikàle munda mwà muntu, neàmanyishè dibuulula Dyèndè. Cyà bushùwà.

¹⁵¹ Nènye neenù mu Maatàayi 28.19: “Ndàayaaku, nùkalongèshè bàà mu matùnga ònsò, nubàtiiza mu Dìna dyà Taatù, Mwànà, nè Nyumà Mwîmpè.”

¹⁵² Mpindyewu tàngilàayi mùshindù wùdi beena nè ànu búsàtù bàà mu èkéleeziyà wa Kàtòlikè. . . Kacya kabùvwakù mu Bible nànsha, kacya kakùvwakù ku twitabàayi wa baataatù bàà kumpàlà kwà Nicée, baataatù bàà kumpàlà—bàà kumpàlà kwà Nicée to. Bàvwa, muntu nè muntu, babàtijiibwe mu Dìna dyà Yesù Kilistò, muntu nè muntu wa kùdibo. Ncilwile mu èkéleeziyà wa Kàtòlikè, ncifùmìne kwòkù aku cibwelè mu èkéleeziyà wa Mishònyì.

¹⁵³ Mpindyewu, mmunyi mùdi mwà kucimòna Nzambi kàyì mutàbèèja dísù dyèbè? Kwèna mwà kucyènza to. Ndi ndòmba bwà Nzambi àtàbeejèku mèsù èbè ku Cyòci eci. Kàdi tèèlejàayi ànu nè ntèmà yònsò mpindyewu.

¹⁵⁴ Mpindyewu nêngàngatè Mufundù wèbè, Maatàayi 28.19 nè: “Ndàayi, nùkalongèshè bàà mu matùnga ònsò, nubàtiiza mu Dìna dyà Taatù, Mwànà, Nyumà Mwîmpè.”

Nwàkabàtijiibwa mùshindù kaayi: “Mu dìnà dyà Taatù, mu dìnà dyà Mwànà, mu dìnà dyà Nyumà Mwîmpè”? Aci kacýena nànsha mene cifùnda mu Mifundu to. Nènku ndi muswè bwà muntu kampàndà. . .

155 Wêwè udi wamba nè: “Bùsàtù bunsantu bubènèshùibwe.” Mpetèlaayikù mwàkù “bùsàtù” mwaba kanà wònsò mu mabèjì à Bible wa Nzambi. Ncintu cikwàtakaja ku byanza kùdì muntu, mmukùsù wà kale wà manyaanù wà èkèleeziyà mujingilakù, bwà kwangata kaaba kàà Nshinga wà màyi àà Nyumà Mwîmpè wa Nzambi. Cintu bu nàнку kacitukù to. Cintu bu nàнку kacitukù to. Wêwè ucipetè kàdi ulwe kùndì. Udi mwenzèjìibwe bwà kucyènzà, bu mwena Kilistò, wêwè mucipetè. Kacyèna mu Mifùndù yà Cijila yà Nzambi to. Nènku “Taàtù, Mwàná, nè Nyumà Mwîmpè” ncitooyishila mu ìfernò, cintu pààci nè n’Nzambi yìsàtù kacitukù to.

156 Mpindyewu, mémè ndi ngiitabuujà Buutaatù bwà Nzambi. Ndi ngiitabuujà Buumwàná bwà Nzambi. Mémè ndi ngiitabuujà cipungu cyà Nyumà Mwîmpè cyà Nzambi. Kàdi N’Nzambi umweumwe awu mu cipungu cyònsò, kî n’Nzambi yìsàtù to.

157 Mpindyewu: “Mu Dîná dyà Taatù.” Bible kî mmwambè nè: “Ndàayi nukabàtiizè mu dîná dyà Taatù, dîná dyà Mwàná, dîná dyà Nyumà Mwîmpè” to. Mmwambè nè: “Ndàayi nukabàtiizè,” mwàkambà Yesù, nutàngilè paanyimà nè, “Dîná dyà Taatù, Mwàná, nè Nyumà Mwîmpè.” Kî nnè “dîná dyà Taatù, dîná dyà Mwàná” to, aci ncifwànyine kubàvwija bantu nkàaya, kàdi Kabyèna nàнку to. “Mu Dîná dyà Taatù, nè...” Nè mmutwàngaji, nè cyena-bwalu cyàbò cimwècimwè aci. “Mu Dîná dyà Taatù, nè dyà Mwàná, nè dyà Nyumà Mwîmpè.” Kî nnè “mu dîná dyà Taatù, dîná dyà Mwàná, dîná dyà Nyumà Mwîmpè to”. Kàdi: “Mu Dîná dyà Taatù, Mwàná, nè Nyumà Mwîmpè.” Nwamònu anyi? Mpindyewu tàngilàayaaku.

158 Ke bàpostòlò balaaba maanyi aba biimàne bàya batàngile ku Mpenta, bwà kupeta Nyumà Mwîmpè. Bàakaya buludì ku Mpenta nè kupetabò Nyumà Mwîmpè. Mpindyewu, Èkèleeziyà mmubanjiya, netwènzè cinyi? Cintu cyà kumpalà cidi cipàtuka, Dibèjì dyà bwanga didi nè cyà kufùndiibwa. Byàkakèngela bwà Ngàngàbukà Simona Peetèlò kufùndayè Kabèjì kàà bwanga kàà kumpalà aku, bwalu Yesù wàkamupèèsha kasalà. “Ndi nkupèèsha nsapì ayi, Peetèlò. Cyònsò cyùdi wêwè uswika aci, Kabèjì kàà bwanga kaùdi ùfùnda pa buloba apa aka, mémè nènkàkidilè mu Nzùbu wa disùmbishila bwanga. Fùnda eci, nè Mémè nèncitàbè.”

159 Bàakenza cinyi? Pààkuumvwà bantu mutooyi wònsò ewu pambèlu mùshindù awu, kwambabò nè: “Eci cidi cyùmvwija cinyi?” Bakwàbò, bàakula mu myakulu. Bàakamba nè: “Tudi tuumvwà byenzedi bilenga byà Nzambi.”

160 Cyàkambà Peetèlò ncinyi? “Nyingàlalaayi, muntu nè muntu wa kunùdi, nè nùbatijìibwè mu Dîná dyà Yesù Kilistò bwà dilekelediibwa dyà mpèkaatù wenù, nènkù nenùpetè kupà kwà Nyumà Mwîmpè.”

161 Mpindyewu cyàkenzàbo ncinyi? Bàakasàkidila “Taatu, Mwàna, Nyumà Mwîmpè” kaaba aka, udi kàyi ùya mu Kabèjì kàà bwanga awu to. Ncyà bushùwà. Cikwàbò kàbidì cyàkasàkidilabo ncinyi? “Kabyèna bikèngela bwà wèwè kupàtuka nè kwenza maalu mwàkenzàbo amu to. Kacyèna cikupèsha disànka nè bukolè, nè dyakula dyà mu myakulu, nè bintu byònsò ebi to. Kabyèna bikèngela bwà wèwè kwikala naabi to. Enza wèwè ànu ditonda dyèbè, ulabulangana ku cyanza.” Aci’s ncikwàbò cintu cyà mulungù cyà dyabulu. Pìikalàci cyàkabènzeja nànkù awu pàakangatàbo Bwanga abu, necikwenzèjè mùshindù wùm wèwùm wèwè awu. Angàtà Kabèjì Kèndè kàà bwanga aku ànu mu kòkò menemene.

“Cyàkashiyàbo kùdi ngàzamà, hazilà wàkacìdya.”

162 Mpindyewu vùlukàayi nè, pìikalàbi nè kacya kakùtukù muntu nànsha umwe mubàtìijìibwe, mu Bible emu, mùshindù mukwàbò kanà wònsò pa kuumusha mu Dìna dyà Yesù Kilstò, beena Yudà nè bàà Bisàmbà byà bendè, nè bàdì pambèlu nè bikwàbò byònsò, bònsò bìvwa bikèngela bwà kulwàbò kubàtìijìibwa mu Dìna dyà Yesù Kilstò. Ndi ngèela muntu kanà yònsò kadyòmbò bwà kundeejakù mwaba wùkaadiku muntu nànsha umwe mubàtìijìibwe mu dìnà dyà “Taatu, Mwàna, Nyumà Mwîmpè,” anyi munda mwà bidimu nkàmà yisàtù paanyimà pàà—pàà lufù lwà mùpostòlò wa ndekeelu. Mòna’s, s’mbitòòke kutàmba nè minu yànyi dikùmi yidì kumpàlà kwànyi eyi. Kwèna mwà kucimòna pàdì Nzambi kàyi mukukàngùle mèsù to. Èè, aci, cyòci kaciyi dibuulula dijaalàme to, dìbà adi bwà cinyi Peetèlò, ùvwa nè dibuulula òmwèdìmwè adi, kwalukila buludì. . . Matùkù dikùmi paanyimà pàà Yesù mumanè kumwambila nè: “Ndàayi nukabàtìizè mu Dìna dyà Taatu, Mwàna, nè Nyumà Mwîmpè,” Peetèlò kukudimuka buludì, kwamba nè: “Bàtìijìibwàyi mu Dìna dyà Yesù Kilstò, yònsò wa kunùdì.” Dìbà adi eci cidi nè cyà kwikala dibuulula òmwèdìmwè dyàkapètaye adi. Kàdi èkèleeziyà wa pambèlu pàapa, nè necìikalè ba-trinitaires, biikàle nè dibuulula dyà mashimi, dìbà adi kabèena bàkwàta mudimu nè Nshinga wa màyi à mu mucì to. Bàakangata mukùsù nè kuwùjingila mwaba awu, nè ùdi munkacì mwà kumacisha Mwoyi wà Nzambi mwaba awu. Necìshipè mubèèdì’s! Kaa, mmu bintu kaayi bikwàbò bitùdì mwà kuyakù, mu twitabàayi yènu nè bikwàbò, cìdici cyènzè’s!

163 Lekèlaayi ntòokeshèku eci kakesè. Ndi muswè bwà nwènu kubwelamù nè kwangata Bibles yènu bwà katanci kakesè cyanààna, pa nànkù netùcìvwijè ànu cipwekèle menemene mu mùshindù wà bàna bàCyùmvwa. Buulùlaayi mu Maatàayi, nshapità wa 1. Nudi nè Maatàayi 28.19. Ndàayi mu Maatàayi, nshapità wa 1, ku mvensà wa 18.

164 Tàngilàayi kunweku, ndi muswè bwà nwènu kutàngila nè ntèmà, ewu n’Taatu, ku dyàbakajì dyànyi eku, ewu

m’Mwânà, munkaci, ewu n’Nyumà Mwîmpè, ku dyàbalùmè. [Mwanèètù Branham ùdi ùkwàta mudimu nè bintu bisàtu bwà kuleeja—Muf.] Mpindyewu, Taatù wa Yesù Kilistò Nganyi? Nzambi, Taatù awu. Ncyà bushùwà anyi? Nwènù bônso nudi nwitabuuja nànkù anyi? [Disangisha didi dyàmba nè: “Amen.”] Ncyà bushùwà nè ndi ngiitabuuja. Nzambi, Taatù, n’Taatu wa Mukalenge Yesù. Taatù, Mwânà, Nyumà Mwîmpè.

¹⁶⁵ Mpindyewu ndi ntèlè Mufundu. Tàngilàayi, nudi mwà kuwùtàngila panwàlukilà kumbèlu, anyi kuwùtàngila mpindyewu. “Mpindyewu dilediibwa dyà Yesù Kilistò dyàkenzeka mùshindù ewu...” Maatàayi 1. Tàngilàayi kunweku, ànu múnkaadiku mwambè misangu yàbùngi, wèwè ubala mukàndà wà maalu-malonda, nè ùbala lwà paanyimà apu, angàta ànu Maatàayi 28.19 mùshindù ewu, mu mukàndà wà bwalu-bulonda nè: “John nè Marie bàvwa nè nsòmbelu wa disànka pashiishe.” John nè Marie mbanganyi? Alùkìlè ku ntwàdijilu kwà mukàndà bwà kujandula nè John nè Marie mbanganyi, bu Yèyè mwambè nè: “Ndàayaaku, nùkalongèshè bàà matùnga ònsò, nubàbàtiiza mu Dìna dyà Taatù.”

¹⁶⁶ Ndi muswè nnùkonkèku cintu kampàndà. “Taatu” ndìna anyi? [Disangisha didi dyàmba nè: “To.”—Muf.] Ncyà bushùwà nè kí mmwòmò to. Mu Dìna dyà “Mwânà.” Kàdi “Mwânà” n’dìna anyi? [“To.”] Mmwânzù, ànu bu mùdì “Taatu.” Nànkù “Nyumà Mwîmpè” n’dìna anyi? [“To.”] To, mmwânzù. *Nyumà Mwîmpè* ncidìYè.

¹⁶⁷ Wèwè udi wamba nè: “Nyumà Mwîmpè n’dìna.” Ke mùdì kàbidì *muntu*. Nwamònu’s, mèmè’s ndi muntu, kàdi dìnà dyànyì kí “muntu” to.

¹⁶⁸ Ke cidìYe ncyòci aci. N’Nyumà Mwîmpè. Kì n’Dìna Dyèndè to; ke cidìYe ncyòci aci. Dìbà adi piikalàbi nè “Taatu” kí ndìna to, “Nyumà Mwîmpè” kí ndìna to, nè “Mwânà” kí ndìna to, dìbà adi Dìna dyà “Taatu, Mwânà, Nyumà Mwîmpè” divwa ncinyi? [Disangisha didi dyàmba nè: “Mukalenge Yesù Kilistò.”—Muf.] Cyà bushùwà’s! Cyà bushùwà’s! Mpindyewu, nwamònu’s: “Taatu” kí ndìna to.

¹⁶⁹ Yesù wàkamba nè: “Ndàayi nukabàbàtiizè mu Dìna dyà Taatù, dyà Mwânà, dyà Nyumà Mwîmpè.” Peetèlò kukudimuka, kwamba nè: “N’Dìna dyà ‘Yesù Kilistò.’” Mpindyewu, ke mùshindù awu menemene wàkalondàbo mu Bible mujimà.

¹⁷⁰ Mpindyewu cyàkenzàbo ncinyi? Cìdìbo bènzè kùdì bakùdimunyi bààbò, anyi bantu bàà mu èkèleeziyà ncinyi? Ncinyi cidì malongolodi mènzè? Badijìngile mukùsù wà kale wà cyena màngumba, bwà kwikala bamanyike nè bakwàbò. Byòbi bikèngela bwà mèmè kudyà bisùkwita byà mukèlè nè kunwà màyi à ku mulonda, nè kushebeyiibwa bwà diitabuuja, Nèngiimanè bwà Bulelèlè bwà Nzambi nè nèmfwilè pa cikuuku. Ncyà bushùwà. Kakwèna muntu nànsha umwe,

paapà wa ku Loomò, anyi mwèpiskòpò anyi kàrdinalè, udi mwà kukàndameena Cyóci aci to. Èyowà's, mukalenge. Bwalu bùdi cinyi? Cyàkashiyà ngàzamà, cyàkashiyà ba-Méthodistes, ba-Baptistes kucidyabò. Cyàkashiyà ba-Baptistes, beena Mpenta bààkacidya. Mmwaba kaayi—kaayi—kaayi's wè! Nshinga yà mwoyi mmiyè. Eci cidi ànu cintu cishààdile.

¹⁷¹ Mpindyewu, Nganyì udi “Taatù, Mwànà, Nyumà Mwímpè?” “Ndààyaaku, nùkalongèshè bàà mu matùnga ònsò, nubàbàtiiza mu Dìnà dyà Taatù, Mwànà, Nyumà Mwímpè.” “Taatù” kì ndìnà to, “Mwànà” kì ndìnà to, “Nyumà Mwímpè,” kì ndìnà to.

“N’Dìnà kaayi dyùdì wamba adi?” Èè, aci’s ncyenze ànu bu John nè Marie, twàlukilàayi bwà tùjandulè nè cìvwa ncinyi.

“Mpindyewu dilediibwa dyà Yesù Kilistò dyàkenzeka mùshindù ewu. Pàvwà mamw’Èndè Màriyà mubangila kùdì Yözefù kumpàlà kwà yèyè. . . kumpàlà kwà kushààlabò pàmwè, wàkasanganyiibwa mwimite Difù dyà kùdì” (Cinyi?) “Nyumà Mwímpè.”

¹⁷² Pàanyi’s mwà ndyàmbedila nè nwambì nè Nzambì nguvwa Tatw’Èndè. Mmuniyì mùdì Nzambì mwà kwikala Tatw’Èndè, nè Nyumà Mwímpè mwà kwikala Tatw’Èndè? Mpindyewu nudi numòna’s, nwènù ba-Trinitaires, kàdi nwela ba-Unitaires mbilà’s? Lwesu lwà mishila kalwènakù mwà kwamba mbìdikà wa diipikila kàfè mùdiye mufiike nànsha. Tàngilàayi kùnweku, to. Nudi bumvwè cìndì muswè kwamba aci anyi?

¹⁷³ “Taatù.” Wàkamba, nè: “Dilediibwa dyà Yesù Kilistò dyàkenzeka mùshindù ewu. Pàvwà maamù, Màriyà awu, mubangila kùdì Yözefù, kumpàlà kwà kushààlabò pàmwè, wàkasanganyiibwa nè Difù dyà kùdì Nyumà Mwímpè.” Dìbà adi: “Nzambì Taatù” kàvwa nè cyà dyenzamù to? Pìikalàbi nè—pìikalàbi nè Nzambì Taatù, nè Nzambì Nyumà Mwímpè, kì m’Mupèrsonà Umwèumwè awu to, dìbà adi Yesù’s ùvwa nè baataatù bàbìdì, nè Musùngidi wetù ùvwa mwànà mulela mu masandi, mulela nè nyumà yìbìdì mishiilàngàne, anyi, kùdì nyumà yìbìdì mishiilàngàne. “Dilediibwa dyà Yesù Kilistò dyàkadi, Wàkiimiciibwa kùdì Nyumà Mwímpè.” Nudi nwitabuuja aci anyi? [Disangisha didi dyàmba nè: “Amen.”—Muf.] Dìbà adi Nzambì Taatù, nè Nyumà Mwímpè, n’Nyumà Umweumwe awu, cyanààna Ùvwa nè baataatù bàbìdì.

¹⁷⁴ “Cyònsò eci cyàkeenjiibwa, cìvwa nè cyà kukùmbaja cìvwa cyakùdìibwe kùdì mupròfetà wa Mukalenge, wàmba nè: ‘Mònaayi, virgò neimite Difù, nè yèyè neàlèlè Mwànà, nè bòbò. . . Mwànà, nè bòbò nebàmwinyikè Dìnà Dyèndè” (ewu’s n’Yèyè) “YESÙ, udi Èmanùwèlè, udi mwikale, mumvwijìibwe. . .” Cinyi? [Disangisha didi dyàmba nè: “Nzambì neetù.”—Muf.] Dìbà adi Dìnà dyà “Taatù, Mwànà, Nyumà Mwímpè” ncinyi? [“Mukalenge Yesù Kilistò.”] Cyà

bushùwà's. "Dìna Dyèndè nedibìkidiibwè" ["YESÙ,"] "bwalu Yèyè ke wasungila bantu Bèndè ku mpèkaatù yàbò."

¹⁷⁵ Mpindyewu, "Taatu, Mwàna, Nyumà Mwímpè" ncinyi? Mukalenge Yesù Kilistò. Dìna Dyèndè nganyi? Kí ndìna to... "Taatu" kí ndìna to, "Mwàna" kí ndìna to, "Nyumà Mwímpè" kí ndìna to. Kàdi Yesù Kilistò ùdi "Mukalenge Yesù Kilistò," udi Taatu, Mwàna, Nyumà Mwímpè, midimu yisàtù yà Nzambì mimwènèshìibwe mu mubidi, mu Mupèrsonà ùmwèpelè. Àlèluuyà! Mwanèètù, aci's m'Bulelèlà. Ndi ngambilamù, Nzambì, nèngiimanè mu Ditùkù dyà Cilumbulwidi pa Cyòci aci.

¹⁷⁶ Cyàkenza yelèkè ncinyi? Mwikàle nè Nzambì Taatu mu Dyulu, Nzambì Mwàna musòmbe *apa* pa nkwasa wa butumbi, nè Nzambì Mwí- . . . Kabyèna bikèmesha mutùdi katùyì nè kutùdi tufika to!

¹⁷⁷ Nzambì ùdi munda mwènù, ùdi neenù. "Nèngikalè neenù, munda mwènù mene, too nè ku ndekeelu kwà buloba. Nè bintu bìNdì ngènta, nenùbyènzè pèenù," kí m'Mupèrsonà mukwàbò to, kàdi Nyumà Mwímpè umweumwe awu, Mupèrsonà ùmwèùmwe awu, Nzambì umweumwe awu. Yesù, Mukalenge Yesù Yèyè mwinè, ùvwa Ntentà uvwa Nzambì musòmbèlemù, bwà kuDimwènesha, bwalu Yèyè ùvwa Nyumà. Ùvwa Nyumà.

¹⁷⁸ Mpindyewu, Yesù kàvwa wa Cyendèlèlèlè to. Nzambì ngwa Cyendèlèlèlè. Yesù mpindyewu ngwa Cyendèlèlèlè bwalu Nzambì mmwangàte Mubidi.

¹⁷⁹ Kùvwa musangu kampàndà, kumpàlà kwà difùkà dyà dyulu nè buloba, mvwa wa Cyendèlèlèlè. Pàakangelelà Nzambì meeji, wàkangelela meeji kumpàlà kwà difùkà dyà buloba, dìnà dyànyi dyàkatèèkiibwa mu Mukàndà wà Mwoyi wà Mwàna wa Mùkòòkò, nènku's ke mùvwà kàbidì dyèbè, kumpàlà mene kwà kwikalakù katete kàà lusenga. Mbanganyi bàdi bamanyè nè aci m'Bible? Mbanganyi bàdi bamanyè nè Nzambì wàkafunda dìnà dyèbè mu Mukàndà wà Mwoyi wà Mwàna wa mùkòòkò kumpàlà kwà difùkà dyà dyulu nè buloba? Dìbà adi, mu ngeelèlù wa meeji wa Nzambì, tuvwa balediibwe dìbà adi mene mu Bukalenge Bwèndè.

¹⁸⁰ Dìngà ditùkù kulwakù mubidi kampàndà ku nsòmbelu wa cijila wa bantu basèlàngàne, taatu wanyi nè maamù. Ke bóbò kundela, kàdi's ke mèmè ulwàlwa ewu, William Branham, muleejìibwe mu mubidi wà musunya. Mpindyewu nudi bammanyè mèmè bu William Branham, muntu kampàndà. Nzambì ùvwa mummanyè bu William Branham, meeji mu mutù Wèndè Yèyè mwinè, nè cyakwidi kampàndà.

¹⁸¹ Dìyì ncinyi? Dìyì mmeeji mapàtula mukana. PàakaakulàYe nè kwamba nè: "Yèyè àlwe," mèmè è kulwa. PàdiYe wàmba nè: "Yèyè àlwe cyàkàbidì," mèmè nèndwè cyàkàbidì. Èyowà's, mukalenge. Nè pa nànkù, nudi numòna's, meeji kampàndà; dìyì mmeeji meela patòòke.

182 Nzambi ùkaadi mumanè kufila Dìyì, cintu cimwèpelè cívwa meeji Èndè, nè Yèyè wàkacyàmbe patòòke. PàdìYe úcyàmbe patòòke, cìdi cyènzeka. “Kwìkalè,” nè cyàkiikalakù. Ke Nzambi awu, wa bukolè bwònsò, Yèhowàh wa ngulu yònsò, wa bukolè bwònsò. Mpindyewu mMuleejìbwe.

Mpindyewu, bwà kupàtula eci patòòke, bàvwa nè nè cyà kwìkala nè dibàtiiza dyà mashimi bwà kwenza cyòci eci.

Nudi numòna’s, ncisokoka. Bàà pa buloba kabèèna bàcimòna to, nè kacyèna mwà kumwènèka to.

183 Mpindyewu tàngilàayi nè ntèmà yònsò, patùcìdì nè dibà dikùmbàne bwà—bwà kujikija nè kwenza mulongo wà babèèdì apa. Eyowà. Ndi muleepèshe kupita mùmvwà ngèelela meeji, pa cyòci eci. Indila kakesè mpindyewu, ndi nè cikwàbò cintu cìndì muswè kunwàmbla.

184 Ki bwà cinyì: “Taatù, Mwànà, Nyumà Mwímpè” ùdi Nzambi mulelèlà umwèpelè awu. Ùdi nè Dìna dimwèpelè. Dìna Dyèndè n’Yesù Kilistò. Wàkalediibwa Kilistò Mukalenge pàkalediibwàYe. Yèyè, *Kilistò*, mbwena kwamba nè “Mulaaba maanyi.” *Mukalenge* mbwena kwamba nè “mwena-cintu.” Yèyè ùvwa “mwena-cintu” nè “Mukalenge.” Ke pashiishe Nzambi kutùuluka nè kusòmbela munda Mwèndè, cyàkaMuvwijà byònsò Taatù, Mwànà, nè Nyumà Mwímpè; Alpha, Omega, Cibangidilu nè Ndekeelu; Ewu Wàkadikù, Udikù, nè Wálwa Awu; Muji nè Mùtòlokù wà Davìdì, byònsò bibìdì Muji nè Mùtòlokù wà Davìdì; Mùtootò wà mu Dìndà, wa Kumpàlà nè wa Ndekeelu. N’Yèyè awu. Kaa!

185 “Cìdì ngàzamà mushiye.” Mmunyì mùdì mwà kukuukwila paùdì kùyì mumanyè cyùdì ukuukwila? Mmunyì mùdì mwà kwìkala wa nyumà paùdì kùyì nè Nyumà Mwímpè munda mwèbè? Pawìkalà muswikàkànàngàne yònsò nè musùmbà wà twitabàayi yà èkèleeziyà, neyikwenzèjè maalu bu bantu bàà mu èkèleeziyà, nè—nè bantu bàà luumù nè batèndeledi, nè bintu byà mùshindù awu. Byònsò abi mbyenzi bímpè, byà nsòmbelu mulenga.

186 Kàdi, mwanèètù, bikèngela ùlediibwè cyàkàbìdì ku Nyumà Mwímpè mushùwashùwàlè udi ufùma ku Dìyì dyà Nzambi awu. Nènku Dìyì dìlelèlà dyà Nzambi, padìDi dibwela munda mwèbè, neDimweneshè Bulelèlà. “Yèyè, Nyumà Mwímpè, Yèyè neàlwe. Neàmfidile Mémè bujaadiki. Yèyè neàmweneshè Bulelèlà. Yèyè neàngatè bintu bímvwà munùleejè abi, ùleeja bintu bìndì mwambè, nè yèyè neànùleejèbi. Nyumà Mwímpè neànùleejèbi.” CyènzàYe, s’ki Yèyè awu.

187 Cyàkashiyàbo kùdì ngàzamà, hazilà wàkacìdya. Nè cyàkashiyà beena Kàtòlikè aci, ba-Luthériens bàakacìdya. Nè cyàkadyà ba-Luthériens, cyàkashiyàbo, ba-Méthodistes bàkacìdya. Nè cyàkashiyà ba-Méthodistes, beena Mpenta kucìdyabò. Cìdi nè cyà kwenzekela penyì? Cinkùtunkùtu

mùyombelè cyònsò cyà mpèkaatù eci, bintu byònsò ebi, malongesha, bikwàbò bintu bitùdi mwà kwamba ebi, kaa, ekèlekèle, dilabulangana dyà ku cyanza, dimyaminangana dyà mâyi.

¹⁸⁸ Nganyi ukàadikù muumvwè bwà dimyaminangana dyà mâyi? Cindeejèku mu Bible. Nganyi ukàadikù muumvwè bwà dipòngolola dyà mâyi? Cindeejàayibi mu Bible. Dibàtiiza didi difuma ku, mwàkù *baptizo*, wùdi wùmvwija nè kwikala “mujiikiibwe nè mubwikila.” Cyà bushùwà. Aci’s m’Bulelèlà bwà Dìyì dyà Nzambi. Kaa, bu tuwìkala nè dībà, tuvwa bafwànyine kutùngunuka nè bintu byà mashimi.

¹⁸⁹ Ndi ngamba nùku, nwènù bananga bàanyi. Ntèèlèjaayi. Nèngiimanè neenù dīngà ditùkù mu Ditùkù dyà Cilumbulwidi. Nebikengelè bwà mémè kulumbulula’s. Ncyàkulumbulula bwà twitabàayi kampàndà to. (Pa nàнку nkwàcìshèku, Nzambi!) Nèndumbululè bwà Bible. Ke Mukàndà ungàtwà mpàndà awu’s.

¹⁹⁰ Kakwènàkù mwaba nànsha wùmvwè mu Bible wùkaadibokù bapetè Nyumà Mwìmpè kabàyi nè masaluka to, dyakula dyà mu myakulu, nè mbilà, nè disaamuna dyà Nzambi, nè bīpròfetà, nè mamwèneshiibwa. Kacya kabàtukù banji kubànda bwà kulabulangana ku cyanza nè muyiishi awu kàdi kukwàta njila kuya nànsha.

¹⁹¹ Kakwèna mwaba nànsha wùmvwè mu Bible wùkaadibokù bapetè to, wàkabàtijiibwàbu to, pa kuumusha kubàtijiibwa mu Dīnà dyà Yesù Kīlistò.

¹⁹² Kacya kakùvwakù mwaba nànsha wùmvwè mu Bible wùkaadibokù balongeshe būsàtù to. Cīvwa misangu yònsò ànu “Nzambi umwèpelè.” “Tèèlejaayi, Èyi Izalèlèlà, Mémè ndi Mukalenge Nzambi webè, Nzambi umwèpelè! Kwàkwikala kàbidì nè nzambi mikwàbò kumpàlà Kwànyì to. Mémè ndi Mukalenge Nzambi webè.” Kī n’Taatu, nè Mwànà, nè Nyumà Mwìmpè to, kàdi “Mémè ndi Nzambi!” Kashidi, Yèyè ùdi Nzambi! Yèyè ùvwa misangu yònsò ànu Nzambi. Yèyè neikalè misangu yònsò ànu Nzambi.

¹⁹³ Nènku pàdi dīngumba dikubènga, paùdi ulwa mu disangisha nè ùteeta bwà kuleeja dinanga dyà bwànà bwètù, nànsha nè màngumba àbò awu, bwà kuteeta bwà kwambula nè kusungila baùdi mwà kusungila, kubàkòkelamù, kulekela Nzambi àngatè bìdi bishààle abi. Kàdi bwalu udi mwimàne pa Malelèlà à Bible, bàdi bàkwipata. Kacyèna mwà kwikala cīngà cintu to ànu dìyelè dipwekèle dyà dyabùlù, bwà kupangisha bānà bwà kubwelamù bwà kumòna disangisha nè kusungidiibwa. Ncyà bushùwà.

¹⁹⁴ Ke Lubwebwe lushìndàme lwà Dìyì dyà Nzambi ndwòlò alu. Nèngàngatè muntu kanà yònsò, dībà kanà dyònsò didìbo baswè adi, nè kuya naabò mu dinanga dyà bwànà bwètù, nènku ndi muswè bwà ùndeejèku cintu cīmwpèlè cīndi mwambè cidi kaciyi Bulelèlà bwà mu Bible. Èyowà’s, mukalenge. Ncilelèlà.

Mpindyewu, bwalu udi utwà ku Cyôci aci, udi wipaciibwa. Ndi ntèkemena nè nebiikalè mùshindù awu. Nzambi ngudi mwambè nè nebiikalè mùshindù awu.

¹⁹⁵ BàakaMwenza mùshindù wùm wèwùm wè awu. “Nkwépi Kùdi mupetéle malonga? Mmu cilongelu kaayi múdi Wèwè mufùmìne? Udi nganyi, Mùfaalèsà anyi Mùsadòkà?” Yèyè ùvwà Mwánà wa Nzambi udi nè mwoyi, Kàakangata luseke lwà nànsha umwe wabò nànsha.

¹⁹⁶ Pa nàнку nkwàcishèku, Nzambi, ndekèlèku mpetà cyumvwilu cìmpè cikùmbàne, ndekèlèku mpetè cishìmikidi cikùmbàne, ndekèlèku ngiikalè muntu mukùmbàne, ngiikale Kilistò mukùmbàne, bwà kwimana pàà nkààyanì (mémè mwimàne, bikèngela ngiimanè mùshindù awu) nè kwamba Bulelèlà, nè ngiimanè. Eyowà's, mukalenge. Mbipiciibwe nè mémè muyiishè Èvànjeeliyò kùdi bantu bàtaanu, kutàmba kwikala nè mìliyò yìdi yitèèleja. Ndi ngàmba Bulelèlà. Kacya ncitukù mudyè cibàngà to. Mvwa muswè eci, bwalu Nzambi ùkaavwa mungambile bimanyinu binène ebi nè bikwàbò bìdi munkaci mwà kupàtudiibwa, bu dimwèneshiibwa dyà dibikà Dyèndè dyà ku lufù, nè bikwàbò, mbwà Èkèleeziyà. Bantu bàdi bakwàte nè byà luse abu kuntwaku, nè baswikiibwe mu twitabàayi ayi nè bikwàbò, mbapàyamù tètè, bu batwà manga à dibènga kubola.

¹⁹⁷ Nzambi àbèneshe mwoyi wènù. Ncyàkunùshiya mu ngiikàdilù awu to. Mémè nèn wàmbilè cidi Nzambi mwàmbè: “Kàdi Mémè nèngààlujululè byònsò bìdi hazilà mudyè, cyònsò cyàkadyàbo kùdi yelèkè, cyònsò cyàkadyàbo kùdi ngàzamà aci. Mémè nèngààlujululè, mùdi Mukalenge wàmba!” Ndi ngambilamù, ndi ngènza cipròfetà eci. Kumpàlà kwà Dilwa dyà Mukalenge, Diitabuuja dilelèlà dyà bàpostòlò, Dilongesha dilelèlà dyà bàpostòlò, Nyumà mulelèlà wa Bible, mulelèlà, Ùdi mu njila Wendè patùdi twakula apa, utèeta bwà kuDisebela njila, kukola kupàtuka kàbìdi.

¹⁹⁸ Beena Mpenta bàvwà naaci, ku mbangilu. Cyàkenzàbò ncinyi? BàakaCyèla mu kaacijèngù, è kubanga kutwà mènà. Nènku Yèyè wàkaCikòsa. Aci ncyà bushùwà menemene. Ke kulwaku, pàakatùmà Mukalenge mapà aa, mapà makesè mapwekèle àdiYe mumpèeshe aa. Bàcidi ànu munkaci mwà kulwa, mbaswè bwà mémè kwikala dipòngoloka dyà mvùla mishiishe ayi; mbacyenzè bulongolodi bupàtùke mu cyôci aci. Mbaswè bwà ndwe kushààla wa mu beena Assemblées.

¹⁹⁹ Ndi mwimàne ànu munkaci mwà ditàmbà dyònsò didi dilembelele kuntu kwàka adi, ànu mwab'ewu ku cikuuku cyà Muci, kàdi kwamba nè: “Eci ke Cishìmikidi. Kòsa mishimi misùnsùke yà kale eyi, bwà Mwoyi wàmòna mwà kubwela munda mwènù, dibà adi nenùpetè bipròfetà, newikalè nè dijingulula, newikalè nè Nyumà, newikalè nè bukolè. Newikale

nè dyalujulula dyà Èkèleeziyà mulelèlè, díbà dyúdi walukila ku Mwonji mulelèlè nè Mwoyi mulelèlè.”

²⁰⁰ Kacyèna mwà kulwila ku mukùsu kampàndà udi uCipwekesha panshi, kàdi kwamba nè: “Cìvwa nditùkù dikwàbò. Nditùkù dikwàbò.” Cidi ànu cimwècimwè aci kashidi. Yèyè ùdi Alpha nè Omega; Cibangidilu nè Ndekeelu. Kakùyì mpatà to. Nebikengelè bwà wèwè kwalukila ku Cishimikidi, bwalu: “Pa lubwebwe elu Nèngiibakilèpu Èkèleeziyà Wanyì, nè biibi byà ifernò kabyèna mwà kuMutàmba bukòlè to.”

²⁰¹ Nzambì ànùbènèshè, balundà bàanyi. Ndi mumanyè nè nudi nwela meeji nè ndi ànu nè ndambù wa mutooyi cyanààna, mupàtùke mu bulongàme ndambù, kàdi kabyèna nànkù to. Ndi ngèèla meeji nè ndi mu bulongàme nè Dîyi edi.

²⁰² Nyumà wa—wa Nzambì ùdi kaaba aka, Nyumà umweumwe wàkafùnda Bible awu. Piikalà Nyumà udi mufùnde Bible awu, mwà kwamba nè “amen” musangu wònsò wùdi Mèyi à Bible àkula. Piikalàbi nè, *mwaba awu*, bantu bònsò bàakabàtijiibwa mu Dìna dyà Yesù Kilistò, Nyumà mulelèlè wa Nzambì neàmbe nè: “Amen. Aci’s m’Bulelèlè.” Nè Bible mmwambè nè: “Yesù Kilistò, umweumwe awu makèèlèlè too nè kashidi,” “Nèngiikalè neenù misangu yònsò, munda mwènù mene, too nè ku ndekeelu kwà buloba,” Nyumà mulelèlè wa Nzambì neàmbe nè: “Amen.” Nènkù aci cyòci ciikàle Nyumà mulelèlè wa Nzambì, díbà adi makòlè malelèlè nè dimwèneshiibwa dyà Nyumà neàmDimwèneshè nè Nyumà mulelèlè ewu. Lumbùlwishaayi Dîyi dinùdi nutèèleja. Dìlumbùlwishaayi nè Bible. Tàngilàayi byenzi Byàdi. Tàngilàayi byenzi Byàdi.

²⁰³ Kùdikù bantu bàdi kaaba aka bwà kubàtijiibwa, bàkvwà kacya kabàyikù bânji kubàtijiibwa, baswè kubàtijiibwa anyi? Ela cyanza cyèbè muulu. Èyo.

²⁰⁴ Kwòkò kakùyì dibàtijiibwa to díbà adi, èyo, díbà adi netùsambidilè babèèdi. Kùdikù muntu kaaba aka udi usaama anyi? Elà cyanza cyèbè muulu, wèwè udi muswè bwà bàkusambidilè awu. Mbanganyi mwab’ewu bàdi beenyi munkaci mwètù, nè baswè bwà bàbàsambidilè; Ncyèna mukumanyè to, kàdi’s ndi mwenyi, ncyèna mukumanyè to? Èyo. Babèèdi nè beena ntàtu, ncyèna munumanyè to.

²⁰⁵ Piikalàbi nè Nzambì ùdi Nzambì, piikalàbi nè Yèyè ùdi Nzambì wa Dîyi dindì nyiisha; Yesù wàkamba nè: “Bintu bìNdi ngèenza nenùbyènzè pèènù.” Ncyà bushùwà anyi? Yesù wàkamba nè: “Bintu bìNdi ngèenza nenùbyènzè pèènù. Nenwènzè byàbúngì bipite ebi, bwalu Ndi nya ku Taatù.” Cìvwa ncinyi? Kukudimuka kuumuka ku Muntu, mubidi kampàndà, kwalukila cyàkàbidi mu Dikunji dyà Kapyà. Pààkatuutakeenà Nendè Pòlò mu njila wa ku Damàsèkè, Yèyè ùvwa cinyi? Dikunji dyà Kapyà. Ncyà bushùwà anyi? S’ki cìvwaYe. Yèyè ùdi cinyi leelù ewu? Ncinyi cidìYe mu cimfwànyi *cyàcya*?

Wêwè udi wamba nè: “Kaa, udi mwà *kwamba* nàнку, Mwanèètù Branham.”

206 Piikalàbi bulelèlà menemene nè aci mbulelèlà bwà Nzambì, piikalàbi nè Cìdi Dikunji dyà Kapyà òmwèòmwè adi, Yesù Kìlistò umweumwe awu, mèmè ngàmba nè Nyumà Wendè mmùbwelè munda mwànyi, Yèyè neenzè cintu cìmwècìmwè cyàkenzàYe aci. NeCìpetanganè nè Dìyi dyònsò dyàkambàYe adi, nànsha twitabàayi yà cyena màngumba myàmbè cinyi. NeCyàmbè Dìyi Dyèndè. Yèyè wàkaCyàmba.

207 Bupidyà bwàbò kabwàkaMwimanyika to. Twitabàayi yàbò nè òngumba adi, Yèyè kààkangatakù luseke nànsha lùmwè lwà ku byòbi abi to. Wàkayiisha Èvànjeeliyò uvwa kàyi musopakaja uvwaYè mùmwè kùdi Nzambì. Wàkiimana nkàayèndè. Cyà bushùwà, Wàkiimana nkàayèndè. Ku Kàlvariyo, kakùwva nànsha umwe uvwa mwà kwimana ku luseke Lwèndè to. Yèyè Wàkiimana nkàayèndè.

208 Wêwè nè cyà kufika ku diikala cintu cyà nsongo, neùtwe ku cyà Nzambì, newìmanè nkàayèbè. Ngwèwè! Kì mbàa pa buloba to, kì ng'èkèleeziyà webè to, kì òngumba dyèbè adi to. Ngwèwè, mpankaci pèèbè nè Nzambì. Nànsha ciikàle cinyi. . .

209 Branham Tabernacle ùdi mwà kwenza cyònsò cìdìbo baswè kwenza aci. Ndi muswè bwà kwitabuujabò Nzambì; ndi muswè bwà bàlwe naanyi. Kàdi bóbò kabàyi balwè to, mèmè ncyàkudyà naabò cibàngà mu kaacintu kàabò kashàadile aku to. Mèmè nèntwè ku cyà Nzambì.

210 “Ba-Méthodistes. Newènzè cinyi, Mwanèètù Branham? Ba—ba-trinitaires bàa cyena Mpenta?” Mvwa mujaadike nè ndi mubànangè. Ndi muyè kùdìbo, nè mutùmìibwe mu Assemblées de Dieu nè mu église de Dieu.

211 “Nènku ba-Unitaires, wèwè ubèngangana nè ba-Unitaires bwà wabò ngiimànyìnù wa ‘umwèpelè’ awu, mùshindù awu.” Èyowà’s, mukalenge. Yesù ùvwa nè Taatù. Yèyè ùvwa Nzambì. Bóbò bàdi bàbàtiiza mu Dìna dyà “Yesù.” Mèmè ndi mbàtiiza mu Dìna dyà “Mukalenge Yesù Kìlistò.” Kùdi ba-Yesù bààbùngì, kàdi kùdi Mukalenge Yesù Kìlistò ànu umwèpelè. Nwamònu anyi? Kì mmu Dìna dyà “Yesù” to. Kàdi mu Dìna dyà “Mukalenge Yesù Kìlistò,” aci’s ke Taatù, Mwànà, Nyumà Mwìmpè.

212 *Mukalenge*: “Mukalenge wàkambila Mukalenge Wanyi nè: ‘Sòmba ku dyàbalume.’” Mwànà, *Yesù*. *Kìlistò*, Logos wàkapàtuka mu Nzambì awu, ku cibangidilu. Taatù, Mwànà, nè Nyumà Mwìmpè. Ki bwalu mbwòbù abu’s.

213 Kaa, ndi nè disànkà dyàbùngì bwà bwalu abu! Mwoyi wànyi ùdi ànu ùcyònkómoka’s! Nè pa kumanya nè Nyumà Wendè, Nyumà wàkafùnda Dìyi awu, ùdi ùpetangana nè Dìyi, ùjaadika nshinga wa Mwoyi. Udi ùbwelamù, ùDimwènesha. Nzambì ikalè

neenù. N'Yesù Kilistò Mwânà wa Nzambi. Ndi mwambè Bulelèlà pa bìdi bitàngilà Dîyi Dyèndè.

Mpindyewu nwènù, nwènù beena mu tabernacle, ndi nùsambidila misangu mikwàbò. Tudi pashiishe. Mwwa mupicishe kakesè ndambù, ndi mupicishe dîbà kakesè ndambù. Mwwa mutèkèmène musumbà wà kubàtiiza.

214 Tàngilàayi. Piikalà Nyumà Mwîmpè kaaba aka, netwikalè. . . Yèyè—Yèyè neàkwondòpè. Ndi muswè bwà bantu bàdi beenyi mu biibi byètù abu, bàdi—bàdi bàsaama nè biikàle mu ntàtu. Nènku mpindyewu piikalàbi nè ndi mwambè Bulelèlà pa bìdi bitàngilà Nzambi, nè bantu aba bambè bulelèlà, mûndi nciyi mubàmanyè to, nè bôbò biikàle bàsaama nè biikàle mu ntàtu; Nyumà Mwîmpè Yèyè mushààle ànu umweumwe awu, Yèyè ùdi mwà kunsokolwela. Aci cyôci Nyumà Mwîmpè umweumwe awu, nè nCiswikàkàne nè cikuuku cimwècimwè aci kwînshì *eku* cidi mikumbi yà yelèkè midyè aci, kàdi kùdi cizubu cikesè cidi munkaci mwà kupweka kwînshì *eku*, cidi munkaci mwà kuswikakaja eci pàmwè, necikwatè mudimu ànu mùvwàci cyenzè kwînshì eku.

215 Twitabàayi yà èkèleeziyà neyàmbè nè: “Kaa, aci kî ncîmpè to. Aci's ndubuku. Aci's—aci's ndyabùlù. Aci's ndubuku's.”

216 Bàakamba byà mwomùmwe bwà bwalu Bwèndè. “Piikalàbò bàbiikila Mfùmù wa nzùbu nè ‘Beelèzèbùlà,’ mmunyi mwàtambabo kubiikila bayiidi Bèndè?” Mmwômò. Nànsha nànkù aci kacýèna ànu ciciimanyika to. Cidi ànu ciciidyundisha, cicitungunuja.

217 Mpindyewu, Yèyè ùcidi ànu Nzambi anyi? Yèyè ùdi umweumwe awu makèlèlèlà, leelù, too nè kashidi anyi? Ùdi ùtwa Dîyi Dyèndè mushinga anyi? Ùdi ùditwa mushinga.

218 Nènku ndi ngènzeja yònsò wa kunùdi, pawikalà kacya kùtukù mwânji kubàtijiibwa mu Dîná dyà Yesù Kilistò to, bàtijiibwà mu Dîná dyà Yesù Kilistò. Cidi èkèleeziyà wa kale musùnsuke awu wàmba nànsha ciikàle cinyi. Aci's ndingu- . . .

219 Nè ndi mumanyè bantu bàmvwà mutwàle mu birò byànyì, nè mulongè. Mu nyungulwilu wa bantu bìmpè, mwa mwà kwamba nè: “Lwàyi bwà katanci kakesè. Ndeejààku wèwè mwaba wúvwà mubàtijiibwe mu dîná dyà ‘Taàtù, Mwânà, Nyumà Mwîmpè,’ piikalàbi nè aci ncyà mu Mifundu.”

220 Nè dîbà dîdiye mufinyina panshì, wàmba nè: “Ndi mumanyè cyôci eci, Mwanètù Branham, kàdi kungeedi patòoke to.” Nwamònu anyi?

221 Mémè nè: “Twàku dilongesha dyèbè nyama ku mikòlò, ndeejààku mwaba wùdi wùmwèpelè. Bantu bònsò mu Bible, bôbò. . .”

222 Bàmwè bàbàtiiza, kabiyi nànsha mu dîná òmwè to nànsha kakesè, bivwa bikèngela bwà kulwabò nè kubàtijiibwabò

cyàkàbìdì, kumpàlà kwà kupetabò Nyumà Mwîmpè. Mbanganyi bàdì bamanyè nànkù awu? Pòlò wàkápìcìla ku nseke mitùmbùkè yà Efèsò, kusanganayè ba-Baptistes. Bàvwa nè mwîmpè... Bàvwa nè mpaasàtá mwîmpè. Yèyè ùvwa mwakwidyanganyi mukùdimùne mucìma, Apòlò. Ke yèyè kubàmbìla nè: “Nwakapeta Nyumà Mwîmpè kacya nwítábuuja anyi?”

223 Bòbò nè: “Katwèna bamanyè nè kùtukù mene Nyumà Mwîmpè kàmpànda to.”

224 Yèyè nè: “Kàdì nwàkabàtìijìibwa mùshindù kaayi?” Mbàmbè mu Roi Jacques nè: “mu cinyì.” Nùcìbalààyi mu nkùdimwinu wa ntwàdijìlù, cìdì cyàmba nè “mmunyi.” “Mu cinyì” cìdì cyùmvwija cintu cìmwècìmwè aci. “Nwàkabàtìijìibwa munyi?”

225 Bòbò nè: “Twétù’s tudi babàtìijìibwe kùdì Yone, muntu umweumwe wàkabàtìiiza Yesù awu.” Adi’s ndibàtìiiza dîmpè. “Wàkapàtuka mu màyi, yèyè umweumwe wàkabàtìiiza... Yone’s.”

226 Èè, Pòlò kwambayè nè: “Aci kacya kùkùmbanàkù kàbìdì to. Aci kacya kàbìdì nè dikwàcìsha to. Yèyè ùkaadi mumanè kulwa, mupoodìibwe pa nkùrusè. Bwalu Yone wàkabàtìiiza bwà kanyinganyinga, kacivwa bwà dilekelediibwa dyà mpèkaatù to, wàmba nè bìvwa bikèngela bwà nwènù kwítábuuja Ewu udi ulwa, Yesù Kilistò.” Nènku pàakumvwàbò cyòcì eci, bàakapàtuka è kubwela mu màyi nè kubàtìijìibwàbò cyàkàbìdì, mu Dìna dyà Yesù Kilistò. Pòlò kubàtèntekelayè byanza, Nyumà Mwîmpè kulwa Yè pambidi pààbò. Kwambabò cipròfetà nè kwakulabò mu myakulu. Ncyà bushùwà anyi? Pòlò kwenzejayè bantu bàvwa bàbàtìijìibwe kùdì muntu umweumwe wàkabàtìiiza Yesù awu, kubàmbìlayè nè bìvwa bìkèngela bwà kubàtìijìibwàbò cyàkàbìdì, bwalu kabàvwa babàtìijìibwe mu Dìna dyà Mukalenge Yesù to.

Ndi nè bukenji bwà kwamba cintu cìmwècìmwè aci. N’Dilongesha dìmwèdìmwè adi.

227 Mpindyewu, cyàkambà Pòlò mu Ngalàtiyà 1.8 ncinyi? Mpindyewu, yèyè ngudi mwambè nànkù. Mbanganyi bàdì bamanyè nè aci m’Bulelèlà? Ambààyi nè: “Amen.” [Disangisha didi dyàmba nè: “Amen.”—Muf.] Ke yèyè kwamba nè: “Mwanjèlò yèyè mufùme mu Dyulu,” katùyi nànsha twamba bwà muyiishi udi mupàtùke mu èkèleeziyà ànyi mu òngumba kàmpànda to! “Mwanjèlò wa mu Dyulu yèyè mulwè mwikàle ùyiisha èvànjeeliyò mukwàbò nànsha wa bìshi mushiilàngàne nè Ewu nùnkù, èdiibwè mulawu. Ànu mùngàmbì kumpàlà amu, ndi ngàmba cyàkàbìdì nè, nànsha twétù anyi Mwanjèlò wa mu Dyulu muyiishè èvànjeeliyò mukwàbò nànsha wa bìshi mushiilàngàne nè Ewu unùkaadi bumvwè ewu.” Nudi bamòne mwaba ùdì mukùmbì wà yelèkè muCidyè anyi? Nwamònu anyi? “Kàdì Mwanjèlò yèyè—yèyè muyiishe cintu cikwàbò nànsha cìmwè

kaciyi Eci to, èdiibwè mulawu.” Ncyà bushùwà. Èdiibwè mulawu. Kanùmutàbaleedi nànsha kumutàbaleela nànsha.

²²⁸ Piikalà mpaasàtà, piikalà mpàndànjlà, piikalà mu—mutangadiki kampàndà, anyi ní nganyi yònsò ewu, ùteeta bwà kukwenzeja bwà wèwè kubàtijiibwa mu mùshindù mukwàbò kanà wònsò pa kuumusha mu Dìnà dyà Yesù Kilistò, lekèlaayi ngambè pàmwè nè Pòlò nè: “Èdiibwè mulawu.” Muntu yèyè munwàmbile nè: “Labùlàngànà nè muyiishi ku cyanza nè nèupetè Nyumà Mwimpè,” èdiibwè mulawu. Bwalu, Nyumà Mwimpè n’Dilediibwa. MbaMuswè mu cyàbò cipidi sungasunga.

²²⁹ Muntu kanà yònsò ewu mmumanyè, mungàmbi kumpàlà amu, dilediibwa ditu mbukooyà, nànsha dyenzèkèle penyi. Dilediibwa diikalè mu cikumbi, didi bukooyà. Dyòdi mu nzùbu, didi bukooyà. Cyòci ciikàle mu lùpitaadi, mu cibambalu cilengeja nè bilòngò byà rose, cidi ànu bukooyà. Dilediibwa ditu misangu yònsò ànu bukooyà.

²³⁰ Nè Dilediibwa dipyàdipyà kî ncintu cyà cishààdilekù to. Cidi bukooyà; kwela kwà mbilà nè tushibà, ànu kukungula, kwakula nè cikukumina, nè bintu byà mishindù yònsò bimònàngàne. Cintu’s mbukooyà, kàdi cidi citwàla Mwoyi. Mùshindù wùmwepele wùdiku mwà kucyènza.

²³¹ Kwàngacikù dilabulangana dyà ku byanza, anyi kufùndisha dìnà dyèbè mu èkéleeziyà kampàndà to, kubànda kwamba nè: “Ndi ngiitabuujà Nzambi Taatù wa Bukolè bwònsò, Mufùki wa maulu nè buloba; nè Yesù Kilistò, Mwànà; èkéleeziyà bansantu wa Kàtòlikè wa cyena Loomò; nè bwobùmwè bwà bansantu.” Wèwè wenza nanku, udi ujaadika nè udi mwena lubùkù.

²³² Cyònsò cidi ciyiikilangana nè bafwè aci, nànsha ciikàle cinyi, ndyabùlù. “Kùdi Mutwàngaji ànu umwèpele pankaci pàà Nzambi nè bantu, m’Muntu awu Yesù Kilistò.” Nè Yèyè kî mmufwè to, kàdi Ùdi nè mwoyi. Nè Ùdi kaaba aka mpindyewu; Yèyè mmubiike ku bafwè. Bansantu bakwàbò bònsò bàà cyena Kàtòlikè nè bansantu bàà cyena Mishònyì abu, nè bakwàbò bònsò abu, mbafwè nè bàdi mu lukità. Bàdi mwà kwikala mu Butumbi. Piikalàbò nè bàvwa bansantu, bàdi Mwàmwa. Nànsha bóbò biikàle penyi, pawikalà wèwè uyiikilangana naabò, kakùyì mpatà to udi munkaci mwà kushipa mikenji yà Nzambi nè kupicila kùdi dyabùlù. Kî mmunsantu nànsha. Cyà bushùwà. Bible gudi mwambè nanku.

²³³ Ngàzamà wàkadyà aci, kàbidì, kàdi Nzambi neàcyalùje ku Nyumà mulelèlè, udi nè mwoyi wa Nzambi udi kàyì ùyiikilangana nè Yudà Munsantu kampàndà to, nè Munsantu *Kampàndà*, nè Munsantu *Kansanga*, nè Cecilia Munsantu, nè bakwàbò bònsò aba, nè bakwàbò bàà ku bansantu aba. Neciikalè Nyumà wa Yesù Kilistò wìkala mwà kwalukila nè kuDimwènesha nè kwenza cintu cìmwècìmwè aci. “Nèngàalujululè, mùdi Mukalenge wàmba.” Nè ndi nsàkidila

Nzambì, leelù ewu, pa ditàmbà dyà Èkèleeziyà udi mwab'ewu, kùdi Mwoyi mukese ùdi ùtwàdija kupàtukilaMù. Ùdi munkaci mwà kuDimwènesha Wòwò mwinè. Nzambì neàlujululè Èkèleeziyà mu kaabujimà ku cipidì Cyèndè cyà bushùwà cyàkàbìdì, kumpàlà kwà Dilwa dyà Mukalenge.

²³⁴ Mukalenge Yesù, disangisha edi n'Dyèbè. Ndi mwambùle ànu bujitu bwà Dìyì, bwà kuDìyiisha. Dyàmányi kuyishiibwa mpindyewu. Cidi mu byanza Byèbè, Mukalenge. Ndi ndòmba bwà nè mu Dìnà dyà Kilistò, Wèwè newàkidilèku bintu ebi, nè mu bukènkè bùdìBi biyiishübwe abu, Mukalenge. Swàkù, piikakà kondò kanà kònsò kàà mwoyi katàpiibwe, swàkù bwà kwòndopiibwa kùdi Bwanga bwà mu Gilàdà. Swàkù bwà aba, Mukalenge, bàdì basòmbe kaaba aka bàvwa bamyaminyiibwè màyi, bapòngolwela màyi, anyi biinyiijüibwe mu nzambì yisàtù abu, bàmonèku cilèmà cyàbò, Mukalenge. Ndi mwà... nànsha mèmè mwà kuyiisha munyi.

²³⁵ PaWàkayiishà nè kwenza cintu cimwècimwè aci, kàdi nànsha nàнку mèsù àbò àvwa mafofo. “Muntu nànsha umwe kèna mwà kulwa kùNdi pàdì Taatù Wanyi kàyì mumukòke to.” Nè nànsha muWüvwà muyiishè nè mwenzè bishimà, nè mujaadike nè Wèwè uvwa Maasiyà awu, kàdi kabàvwa ànu mwà kwitabuuja to, bwalu Yeshàayi üvwa mwambè nè nebiiikalè mshindù awu.

²³⁶ Nènku ndi mufwànyine kusàkidila eci, nè, leelù ewu, nànsha m'Ùdi mwenzè bintu byàbùngi amu, Udi mutwàle Dìyì Dyèbè dilelèlè, muDyalùje kale mu cishimikidi cyà bàpostòlò, muDitèèke pànshì mu kadyòmbò, kàà nè Didi Bulelèlè, nè pashiishe Wèwè kwalukila buludi paanyimà pààDì nè kwenza bishimà byà mshindù wùmwèwùmwè biWàkenza paÜvwà pa buloba apa abi. Cidi cyènzekà ncinyi? Kabèèna mwà kucyènza to. Bwalu, Pòlò mmwambè, ku Nyumà (mwàkambà Yeshàayi amu) nè: “Nebiiikalè bapapè mitù, badibàndishi, banangi bàà bisànkasanka kutàmba kwikala banangi bàà Nzambì, bashipi bàà bipungidi, bashiminyinyanganyi bàà maalu, kabàyi nè didikànda, nè badyombodi bàà aba bàdì baakàne; biikàle nè cimwènekelu cyà difwànà dyà Nzambì, kàdi bàvila Bukolè bwàdì: tàpulukaayi nè bàà nàнку abu.”

²³⁷ Mukalenge, ndi ndòmba leelù ewu bwà Wèwè kuDimwènesha nè—nè kuvwija Dìyì Dyèbè—Dyèbè nè mwoyi munkaci mwètù mpindyewu mene. Bwalu tudi tulòmba nùku mu Dìnà dyà Yesù. Bu Wèwè mwà kucyènza, Mukalenge, bòbò bònsò nebiiitabuuje. Netwèndelè kuumukila mu tabernacle ewu mu dindà emu, twitabuuja nè musùukà wètù mmusungidiibwe, bu Wèwè ànu mwà kubàtuminaci, Mukalenge, nè wàkule nè mwoyi wònsò, patùdì bindile dijingulula Dyèbè apa.

Lekèlè Nyumà Mwímpè, Mwoyi mulelèlè wà Nzambì awu, àbwelèku mu katùpà kakesè kàà ditàmbà kàdi kashàale aka.

Éyì Mukalenge, dipèèshàku dikàndà nè Nyumà Webè. Swàkù bwà . . . Ùdi ùfila bujaadiki, Mukalenge. Ùfila bujaadiki nè, Dìyì Dyèbè ndyà cyà bushùwà. Muntu yònsò ewu mmwena mashimi; Wèwè udi Bulelèlè. Nànsha bantu búngi kaayì bacikàndàmèèna; nànsha cyòcì cikèngela kufwìla diitabuuja, nànsha cyòcì cikèngela kwipaciibwa mu èkèleeziyà, nànsha cyòcì cikèngela kwenza kwà tumpanyè, mùdi nè cyà kwangata ànu muntu umwe nè kwimanyinapù . . . Bânà bàà Nzambì bakwàtè nè byà luse abu, nebàpatukè, nànsha byà munyì, nànsha byà munyì. Nebàlwe, nànsha byà munyì, bwà kutèèleja.

²³⁸ “Mikòòkò Yàànyì mmimanyè Dìyì Dyànyì, kayààkulonda mwenyi nànsha.” Dìyì Dyèbè, mùshindù wùvwàDi dìbiikila mikòòkò Yèbè bwà musangu wà kumpàlà awu, Dìdi dìbiikila cyàkàbìdi. Nènku kayààkulonda mwenyi to. Piikalà Dìyì Dyèbè, dyàkàbìkila mikòòkò Yèbè adi, dyàmba nè: “Nyìngàlàaayi, muntu nè muntu wa kunùdi, nùbatijiiibwè mu Dìnà dyà Yesù Kilistò,” Mikòòkò Yèbè mmiDyùmvwè. Mikòòkò Yèbè yidi yùmvwa cintu cimwècimwè aci leelù ewu. Muntu yèyè mwambè nè: “Kaa, aci’s—aci’s ncintu cyà mufwilakanyi nè Kilistò. Bàtijiiibwàyi, mu dìnà dyà ‘Taatu, Mwàna, Nyumà Mwìmpè,’” mwenyi kayààkumulondakù to. Yòyi neyimanyè Dìyì Dyèbè. Neyitàngile byenzedi Byèbè. Ndi ndòmba, Taatu, bwà Wèwè kwenza byònsò. Dìyì Dyèbè ndyakùle, swàkù bwà byenzedi Byèbè bilondè. Mu Dìnà dyà Yesù. Amen.

[Mwanèètù wa balùme kampàndà ùdi wàkula mu myakulu—Muf.] Mpindyewu, mulundà wanyì, Nyumà Mwìmpè ùdi munkaci mwà kukwata mudimu.

²³⁹ Mpindyewu ndi nkoma batèèleji aba nyimà wanyì. Mpindyewu, ncyèna muswè bwà nwènu bantu bàà mu tabernacle ewu, mbitàmbe bwìmpè mèmè kutàngila *elu* luseke, Ncyèna muswè nànsha umwe wa ku beena mu tabernacle to; ndi muswè nwènu bàtù kacya kanùyikù bânji kwikala mwaba ewu kwònsò eku to, anyì bamanyè nè mèmè ncyèna munùmanyè to. Bantu bàà pambèlù pàà cimenga abu, elàayi byanza muulu kàbìdi, bwà ngàmòna mwaba unùdi nusanganyiibwa, nè nudi babèèdi. Nyumà Mwìmpè àtentemukè mpindyewu. Mpindyewu, kunùdi nwènu, ncyèna munùmanyè to.

²⁴⁰ Nudi nè twartà twà disambila anyi? Bàvwa bààbanye twà disambila . . .? [Katùpà kàà mukàbà wà mèyi munda mutupù—Muf.] . . .mbalengè.

²⁴¹ Nènku Yèyè àcyènzèku ànu nànsha misangu yibìdi. Bible mmwambè nè: “Mukana mwà . . .” Mbantèmù búngi munyi? “Bàbìdi anyi bàsàtù.” Ncyà bushùwà anyi? “Bantèmù bàbìdi anyi bàsàtù, dìyì dyònsò dijaadikiibwè.” Kwangata bòbò bakesè bàbìdi anyi bàsàtù, pashiishe bònsò bwènu itàbùùjaayi. Cyònsò cyùdi naaci dijinga aci, ùcitàbùùjè mpindyewu mene.

242 Udikù muswè kucyènza anyi, bu Yèyè mwà kucyènza? Elà cyanza cyèbè muulu, wámbe nè: “Nèn—nèn—nèncyàngàtè ku diitabuuja, ndi ngèèla ànu cyanza cyànyì muulu cyanàànà.” Nudi baswè kucyènza anyi? Elàayi byanza byènù muulu, bantu bònsò mwab’ewu. Mbanganyi mwab’ewu bàdi bàmba nè: “Kacya ncitukù mwànji kucimòna kwònsò eku to. Nèncyàngàtè ku diitabuuja, mèmè pàànyì?” Elà cyanza cyèbè muulu, wamba nè: “Nèncyàngàtè ku diitabuuja.” Tàngilà kùnweku.

243 Mpindyewu nudi bamòne pândi mwimànyine apu anyi? Kùdi kadyòmbò mwab’ewu. Mpindyewu, piikalàYe Nzambi, Yèyè neàDimwèneshè. Eci cyòci kaciyi Bulelèlà to, dîbà adi mèmè ndi mwenà mashimi nè mupròfetà wa mashimi. Kàbivwa bikèngela bwà nwènù kulwa kuntèèleja kàbìdi to, bwalu ndi mupròfetà wa mashimi; ndi mfilà bujaadiki bwà Kilistò bùdi kabùyì bwà bushùwà to. Kwèna mwà kucyènza nè kujaadika dilongesha dîndì. . . [Katùpà kàà mukàbà wà mèyi munda mutupù—Muf.]

244 Lwàkù. Wèwè udi wa munwemu, mu tabernacle, kî mmwòmò anyi, inábànzà? Udi musòmbe mwaba awu nè cyanza cyèbè cyela muulu, kafulu kakesè katòòke ku mutù. Èyowà. Udi wa mùnwemu. Nwamònu’s, pândi mmòna cyòci aci mwaba awu, bantu mbàdi munkaci mwà kukòka cikèènà-kumòna aci. Ndi mwà kuCimòna ciimàne ànu lwà ku mutù kwàbò aku menemene.

245 Kàdi ndi mwindile muntu kampàndà wùndi nciyi mumanyè to. Mònaaku, nwènù bàà ku tabernacle eku, inábànzà udi nè mùshwàlà wèbè mwela muulu nùku ewu, udi musòmbe ànu lwà mwab’ewu ewu? Udi wa mu. . . Wèwè, udi—udi wa pambèlu pàà cimenga anyi? Juukilà kuulu bwà katanci kakesè. Paùvwà musòmbe mwaba awu, usambila apu, kùvwakù njiyà kampàndà yà pabwayi pa wèwè, dyàkàmwè. Awu ùvwa m’Mwanjèlò wa Mukalenge. Mpindyewu Yèyè mmwimàne ànu ku luseke lwèbè mene mpindyewu. Mpindyewu kùdi cintu kampànda, cyùdi muMulengè. Ncyèna mumanyè nè ncinyi to. Kàdi udi wa pambèlù pàà cimenga. Udi mufwànyine kwikala wa ku Louisville, anyi ku Tennessee, anyi mwaba wònsò wùdi mufwànyine kwikala awu. Ncyèna mumanyè to. Nzambi ngudi mumanyè aci. Kàdi bu Yèyè mwà kumbuulwila cyùdi. . . mùnsokòntù wà mu mwoyi wèbè, ùmanyisha dijinga dyèbè—dyèbè, anyi cintu kampàndà cikwàbò, nenwìtabuuje, witaba Dìyi, wènza bintu byònsò ànu bu. . .

246 Mpindyewu nwènù bònsò, bàdi batàngile mukàji awu, nenùmonè. Mpindyewu lekèlaayi Nyumà Mwímpè, piikalàYe ùcidi ànu Nyumà Mwímpè, Àcìbuulùlè. Kanùciinyi to. Yèyè ùdi Nzambi. Ùtu ùshààla mukwàte ku Dìyi Dyèndè, ku Dìyi dyònsò.

247 Mukàji ewu ùdi ùsaama disaamà dyà mutù, disaamà dyà mutù. Ncyà bushùwà, elà cyanza muulu. Udi kàbìdi nè disaamà dyà mwoyi. Aci’s mmwoyi mubindùlùke. Udi ùkusaama bibi bikolè paùdi ulààla panshi, ùkupàtakaja mweyelu. Uvwa

mupandiibwe. Dipandiibwa adi kí ndyânjì kwondopiibwa to. Ncyà bushùwà. Kí mmwômò anyi? To, kwéna wa mu Ohio to. . . Udi wa mu Ohio. Udi wa mu Ohio. Èyowà's, mukalenge. Wèwè udi nè bujitu pa mwoyi wèbè. Mmwânà wa bakàjì kampàndà, anyi cintu kampàndà. Mmwânà wa bakàjì, mujìmine. Aci's ng'EMU MMÛDÌ MUKALENGE WÀMBA. Ndàaku, wàkidile cyùdi mulòmbe aci, inàbànzà. Wàlengi Cintu kampàndà. Udi witabuuja anyi?

Nganyi mukwàbò uvwa nè byanza byèndè byela muulu. . . ? [Katùpà kàà mukàbà wà mèyì munda mutupù—Muf.] . . . munda emu?

248 Udi witabuuja nè Nzambì ùdi mwà kunsokolwela bwalu busokòmè bwà mu mwoyi wèbè anyi? Udi witabuuja nè n'Nzambì umweumwe ùmvwà nyiisha mu dindà emu awu anyi? Udi nè mundidimbì mufiike pamutù pèèbè, nkànsèrè. Udi witabuuja nè Nzambì neàkwondòpè anyi? Udi witabuuja anyi? Èyowà, mukalenge, nànkù alùkilaaku ku Ohio kùdi mufùmine, ku Lebanon, alùkilà ùsangalè, witabuuja Mukalenge Yesù Kilistò. Ndàaku, itàbùùjà.

249 Inàbànzà mutekète udi musòmbe mwab'ewu ewu, byenzè bu. . . Ùdi nè dikòbà òmusunsuma. Juukilà kuulu, munanga wanyi. Udi witabuuja anyi? Cìvwa cikupapùle ndambù, kí mmwômò anyi? Èyo. Cìdi. . . Neùcitàmbè. Neùmvwè bìmpè. Ndi nkùmòna, pashìishe. Alùkilaaku kwèbè kumbèlu, ùsangalè.


250 Muntu uvwa mwimàne kuulu ànu mu tusunsa tukesè emu awu ùvwa nganyi? Muntu kampàndà lwà paanyimà apu mmùjuuke kuulu, mwaba kampàndà. Wèwè udi nè cyanza cyèbè cyela muulu awu, juukilà kuulu. Udi witabuuja nè Yesù Kilistò ùdi mwà kungambila cìdi lutàtù lwèbè anyi? Udi ucìitaba anyi? Udi witabuuja nè dipondo adi nedikumùkè mu nshìngù mwèbè anyi? Mukàjèèbè udi musòmbe ku luseke lwèbè aku, ùsaama disaamà dyà mutù. Ncyà bushùwà, kàbidi. Nudi bònsò bàà ku Ohio. Tentèkà cyanza cyèbè pambidi pèndè apu, mwanèètù.

251 Mukalenge, swàkù bwà bòndopiibwè, bàalukilè ku mààbò, bènda bàcyònkómoka nè bàsangalè, ku Yesù Kilistò Mukalenge wetù. Amen.

252 [Katùpà kàà mukàbà wà mèyì munda mutupù—Muf.] . . . muntu kampàndà udi ku luseke lwèbè awu. Angàtà Dìyì dyànyì; ndi nkwambila Dìyì dyà Nzambì. Nudi nuCìitabuuja mpindyewu anyi? Bònsò bàdi bìitabuujà, ambààyi nè: "Amen." [Disangisha didi dyàmba nè: "Amen."] Dìyì dyámwèneshiibu. Didi Bulelèlà.

Mpindyewu inyikaayi mitù yènù.

253 Mukalenge, nyèwù ndwa Kùdi mu Dìnà dyà Yesù, mwikàle nsambidila bantu aba. Dìbà dikaadi diyè, Mukalenge. Nènku dìbà dikaadi diyè bikolè kutàmba nè mutùdi twètù twela meeji. N'Dilwa dyà Mukalenge, dikaadi pabwìpi. Tudi tulòmba bwà luse Lwèbè lwàlabajiibwè. Bapèèshèku, Mukalenge,

dyondopiibwa dyàbò. Ndi mpindyewu mpiisha dyabùlù, pa Bukênkè bwà Dìyi dyà Nzambi; bwà nè Yéyè ùdi Mwànà wa Nzambi, bwà nè Yèsù Kilstò Mwànà wa Nzambi ùdi umweumwe awu makèèlèlè, leelù, too nè kashidi, dibàtiiza dyà mu mâyi adi mu Dînà dyà Yèsù Kilstò ke didi dijaalàme . . . 

59-0823 Ngàzamà, Lokùsètà, Yelèkè, hazilà
Branham Tabernacle
Jeffersonville, Indiana États-Unis

CILUBA

©2026 VGR, ALL RIGHTS RESERVED

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org

Dîyì dya bwena-cintu

Makenji ònsò tudi badilaminyine. Mukanda ewu udi mwa kutuuciibwa pa mabeji ne cyamu cya kwebe kumbelu bwa mudimu webe wêwè anyi bwa kupeeshangana, kabiya bya mfranga to, bu cintu cya kutangalaja naaci Evanjeeliyo wa Yesu Kilsto. Mukanda ewu kawenaku mwa kusumbishiibwa, kuvudijjiibwa bya bipitepite, kwediibwa mu cibànzà cya lùntàndalà, kulamiibwa mu cikàlwilà, kukudimunyiibwa mu myakulu mikwabo, anyi kulombesha naawu mpetu kakuyi mukanda wa cishimbi-dîyi wa dikwanyishila mukufundila kudi Voice Of God Recordings® nansha.

Bwa kumanya maalu makwabo anyi kupeta bingà bintu bitudi naabi, anyisha webeje:

VOICE OF GOD RECORDINGS

P.O. BOX 950, JEFFERSONVILLE, INDIANA 47131 U.S.A.

www.branham.org